


SOOKOHA NI SOOWAAKHULA

AHEPERI MPANTTE II

 Kintthuna toko kimuxukhuru khula mmosa a nyuwo omuphiyenrye muhupi wo wira “mwaavekelele amwaar’aka.” Awo khiyaareere, owereiwa saana. Hiyo khinaasuwela yaari exeeni, ni khanisuwenle exeeni yiiraneiyee, waari orapheyasa paahi wowoopiha ni yaari ntoko oohiisuwela, ni ehooma yoophiyaka ikharawu miloko mixexe ni thanu na mosa, yaahaana okhalihwiwa mmikhumini ni ixeele. Tivo... masi awo ari saana vano. Ehooma yothene yoorowa, ni awo ari saana. Vano khareere otteettheya, aavukuwa ntoko ikhiilu xexe ni nuusu, wona waka. Awo kharina... Ohiy’ula t’apacenrye aya oluma etthu okhuma Ttiminku. Tivo nto awo khiyaareere owereiwa, ni hiyo naaroromenle Apwiya mwaha wa yaawo, vano Awo ahaavirihia. Vano nintthuna woolelani wira mutthikele nvekelaka wira awo etthikele okhalana ikuru.

³⁰⁴ Nto vano, emalelo ya esumana ela enrwa, Apwiya yatthuna vale, kihaana orowa oMiami. Mpatthani aka a khalayi, Munna Bosworth, onrowa Owaani, ni owo ohanle ophiya miyaakha emiya vano. Vano owo orookiihana, owo khwira, “Munna Branham, murwe mukoone voohipisa, kintthuna kooleleni etthu kihinatthi orowa.” Nto owo... Ahe, kinoona wira owo onthuna okivekelela, ni okiixaathera matata paahi owo ohinatthi orowa, moosuwela.

³⁰⁵ Ni miyo—miyo kinwehererya wira kinoowerya omaliha mahiku aka ni ntittimiho ntoko F.F. Bosworth. Wa alopwana othene kinaasuwelaaka mulaponi, khula mutthu otonko aka omusuwela mulaponi, nkinatoko omusuwela mulopwana kitonko aka otthunaxa okhala ntoko yoowo, ntoko F.F. Bosworth; ntoko—ntoko murumeyi, etthu enihimy’aka. Miyo nkinatoko omwiiwa mutthu mmosa, mulaponi mothene, nipuro pi nipuro, otonko ohimya nuulumo nimosa mwaha wa F.F. Bosworth voohikhala ekeekhai sothene wira aari “muKristu,” ni itthu sothene “munna eekeekhai.”

³⁰⁶ “Iaiheryo sinnihya ottuli wahu maravulo vamithaakani sa okathi.” Owo munna mmosa oothamaleya saana, ni owo t’owunnuwa saana vano, ookhuveela emiya. Tivo owo—owo onrowa Owaani tu, ti yeeyo tu, ni owo ookileela. Owo aahisuwela wira aamurowa, nto aamulipelela paahi. Owo ohimye wira okathi wooreeraxa w’ekumi awe ti naanaano va okathi owo onlilipelelaawe, masi ohimye wira owo aahisuwela wira aamurowa.

307 Miyo khwira, “Kihaana orowa oMichigan esumana yeela, Munna Bosworth.”

308 Nto owo khwira, “Ahe, muhipise vanci-ene, Munna Branham, nkinwerya olipelela okathi munci-ene. Kinikhala ootteettheyaxa okathi wothene.”

309 Tivo owo onnikhalaka oovikana mpatthani wa miyo, kihikhanle-aka ohirowaka. Vano, vakhala wira kihaana owela ntteeke wira kirowe, kino—kinoowela ni kinootthika wira kikhale vaava khino Ttiminku ohiyu mano; vaahikhale, ahe, nto kihaana weettiha, ni khino enookikuxa okathi wowaatta vakhani.

310 Nto munvekelele Munna Bosworth. Nvekele paahi wira Muluku...ni Owo aamukuxaka tiithi mutokweene, Owo oveleelihe ekaaro ya mooro envenxe, moone. Miyo kinnimpheenta owo, owo onkhalaka ntoko tiithi wa miyo.

311 Mulopwana mukina mutokweene...owo ni Munna Seward. Miyo—miyo kinnaathanla atthu atokweene, miyo—miyo kinnaaphenta awo. Nto Munna Seward mutokweene, owo oronwe orupa siiso, nave. Vekeekhai, Munna Seward khuuluvalanxe saana, nkikupanli, ntoko Munna Bosworth.

312 Nto munvekelele Munna Bosworth. Sothene khasihiyo maluwa nipuro nle, masi ti—ti...Owo onniphavela mavekelo anyu, masi kahi vanci-enexa wa hat’etthu masi yawawe paahi...wira Muluku amutthuniherye orowa ni murettele.

313 Vano...Vano nto ninthuna nuupuwele, nave-tho, wira meelo, Apwiya yatthuna vale, nimmuvitha mmosa wa axipatthan’ihu a ekereja yeela, Munna Sol Coates. Owo aakhalaka vaava imaara sinci-ene, aavaraka muteko okureyu miyaakha sinci-ene. Ni okhwiiye Oxipiritaali wa Atokweene ohiyu uwo. Munna Cox ni miyo naahirowa omoona, ni owo aahikhalana...oovukuwaxa. Vano owo oorowa vano, muKristu. Nto ninrowa ovara miteko s’ovitha Empa ya miteko s’Ovitha Coots meelo oxekuwa ewoora emosa, Munna Neville ni miyo. Nikhuru n’araru Neville ninrowa okhala niipaka; nto hiyo ninrowa okawanaka miteko, Munna Neville ni miyo. Eyo ti wii, nkaasuwenle okathi sipakiwaaya itthokiheryo iya, mwaha wa Meda. Vano siiso, nto, ovithiwa wawe onrowa okhala meelo oxekuwa ewoora emosa, Empa ya miteko s’Ovitha Coots.

314 Vano nto, iwoora piili, Namathanu, Mwenye Wheeler. Hiyo namwiihanaka Pod Wheeler; owo aari, kinooliyala ele yaari yawawe y’eekeekhai...Ni, moosuwela, miyo—miyo kinoomalaru wona mpapheloni mwa ihapari ni nkaasuwela aari pani, mpakha miyo ophavela. Owo aari namwaattamanani ahu mwa miyaakha, nto—nto onoomalaru okhwa. Owo aari vaava ohoolo w’ekereja, ohiyu uwo, ni miyo kaaphavela wira owo orwe okereja. Ohiyu uwo, isumana soophiyaka tthaaru sivinre, eemenle vaavale vale, ni miyo kaatthuna omukupaliha

wira owo avolowe mukereja. Okhala wira, miyo nkikupanli wira aanirowaka okereja wala okhalana enamuna khata ya waamini, onaamwi orina-ene mmiravo mmosa okhanle mulaleyi muPatista. Masi owo khaarina hata enamuna emosa ya waamini vansuwelaaka, nto owo oorowa vano wira akumane ni Muluku. Vano onrowa okhala Namathanu oxekuwa ewoora yaanenli Empa ya miteko s'Ovitha Coots. Nave-tho, Munna Neville n'akina anrowa okhala yiipaka, woovithani weiwe.

³¹⁵ Tivo nto, akhala a nyuwo onththuna okhala mmitekoni, okhanle meelo ewoora yanenli, ahiiso, meelo ewoora emosa. Kinoona wira ti yoolikana. Kahi siiso, munna? Ni ewoora yaneenli, ole mukina. Ti yeeyo? Ewoora yaneenli, Empa ya miteko s'Ovitha Coots.

³¹⁶ Nto vano, Ttiminku voosiisu...Saapatu onookhala olaleeriwa. Ni Munna Neville alakela onimoosuwelihani, okathi yoowo, etthu paahi...vakhala wira ninoowerya okhalana muteko w'ovoniha wa Ttiminku ohiyu, wala okathi xeeni onrowaahu otthika vakhala wira kinoowela ntteeke orowa—orowa oFlorida wira kamoone Munna Bosworth. Nkisuwenle moota xeeni kaakhanle-aka ohiyaka orowa omoona, owo mpatthani aka oophenteya a khalayi. Nto alakela ola okathi ahu wookiserya woonana, Apwiya yatthuna, vale, elapo ela ya vathi. Ni owo...Nkisuwenle sinto kookhala oorowaka omoona ni orwa naanaanoru wala nnari; ni nkinththuna ovalaana n'uwo, masi, moosuwela moota eryaaya, muhaana itthu sikina murinaanyu wira.

³¹⁷ Vano nookhala nuulumo nimosa miyo kaatthunaaka ohimya va ahinakhale atthu anci-ene, n'atthu akhanle apatthani aka.

³¹⁸ Kootteeliwa murima omoona Munna Smith muthiyana vale. Emaara yoopacerya onththikelaaka omoona okhuma khalayi. Ehaali anyu Munna Smith? Mwaakha mmosa, wulu, kookupali emaara yookiserya owoonani...[Munna Smith onoolavula—Mol.] oBenton Harbor, kinniroromela orowa weiwo nihiku nlo. Ti yooreera. Kookupali wira emaara yookiserya kaawonne-akani, waari vamutekoni w'ovitha oLouisville. Ni kinnimuupuwela Munna Smith muthiyana oratta-ene. Moota hiyo...Kaamurowelakaaka omukuxa mukamiyawuni naarowaka okereja. Piriniisi ophareenle-ene ottuli waya ni akwartalaama ettikinyeyaka osulu ni vathi, ni oriiryaka; nto miyo, nnawu nimosa kaahela vate. Oh, wulu! Maasi manci-ene aavira mmuratthini okhuma okathi yoowo, Munna Smith. Ayo, mulopwana. Ahe, hiyo ninnaaxukhuru Apwiya mwaha wa miyuupuxeryo iyo sooreeraxa, ni nlelo ninnaaphenta Yaawo.

³¹⁹ Etthu emosa, mutthu pooti otikinihwiwa, ohiyu uwo...Miyo kaalavula ni Munna Fleeman ota nno mphironi. Nto imaara kamosa-kamosa mutthu khwira, "Omalakaru muteko, exeeni enimwiiriha Munna Branham okhuma n'urowa?"

³²⁰ Etthu aya ti, amwaar'aka ari meekhaaya. Munnona? Vano kapaceryaru olavula, kinoolavula ohiyu nuusu, nto awo anookhala vale, akilaanthe-ene vale meekhaaya okathi munci-ene. Nto mwaha wa yeeyo miyo kinaakuvaaka okhuma, wira kakhale ni yaawo, moone, okathi w'ohiyu; okhala wira kinoopacerya olavula, kinoolavula vanci-ene. Kinoolavula ni *ola* ewoora nuusu. Nkikhanle tu orowaka ni wira, "Ehaali *anyu* ohiy'ula? Ehaali *anyu*? Ehaali *anyu*?" Miyo nkiniira eyo. Miyo kinimweemela paahi khupacerya olavula; nto mutthu mmosa onoopacerya olavula mwaha w'etthu, vano nto kinookhala vaavo ewoora emosa. Munnona? Nto mwaha wa yeeyo, awo anookilaathi n'ulipelela ni siiso. Nto mwaha wa yeeyo. Miyo nkaatthuna wira nyuwo muupuwele wira waari mwaha wo wira nkaatthuna okumana n'apatthani aka n'uvahana matata ni yaawo, ni wooniherya opatthana wahu ni sikina, masi waari mwaha wa enamuna yeeyo.

³²¹ Tivo, vano, atthu othene akhale yaavekelelaka aretta ni ooripiwa murima.

³²² Ni Muhano Harvey ori mmukattyamihoni yoowo wothene, owo oopacerya okhala saana. Ayo, mulopwana. Ni nkinoona. . . Miyo. . . Vano siiso okhanleene, ntoko sinsuwelaaka, mutthu, meetiku mmosa va. Nto miyo kavonya kiri vaplataforma va, Muluku akilevelele. Masi kookupali wira Muluku onoowaakhuliha mameetiku awo mwaha wa etthu amwiirinhe-aya muthiyan'owo. Miyo—miyo kinnaamini wooperariwa, miyo kinnaamini miteko sa mameetiku. Vekeekhai, miyo kinnaamini. Kinoona wira Muluku aaveleelinhe awo nno wira enikhaliheryeke, siiso ntoko Owo aaveleelinhe-awe mamekaaniku a ikaaro ni sikina. Masi mwamuthiyan'ole, meetiku aaroommaathiha, khwira, "Owo khaareerane kankuru, khiivo yaaweryaneya wiiriwa." Mai mwaamukhaani a nikhuru n'anamwane.

³²³ Miyo khurowa, kiphavela omuleeliherya moota ni mavekelo. . . Ni—ni owo mwali paahi, oophiyaka miyaakha miloko miili ni mithanu. Ni moota Muluku onvoninhe-awe mwan'awe mwaamukhaani, onihaniwa "mwaana a mwiiriirya" oxipiritaali w'anamwane vano, ovonihewe menixiite. Nto ni mukhalelo mmosa wowoopiha wa mwa—mwaapar'owo waaryaawe-mo, vano Apwiya khunvonihana naanaanoru. Awo, mameetiku, khayawerya osuwela eyo. Miyo khurowa mpakha wa Muhano Harvey, nto miyo khwira, "Vano, Muhano Harvey, mameetiku arimoohiyani oohiroromela?"

³²⁴ "Ayo, mulopwana. Ti. . ."

³²⁵ Nto aiy'awe khwira, "Ayo, khiivo etthu ekhanle wiiriwaka, owo khoreerane kankuru tu."

³²⁶ Miyo khwira, "Ahe, vano etthu entthunaahu wira, omwaamini Muluku, wira Muluku oo—onvonihe e. . ."

oovoniheni.” Nto miyo khwira, “Moota eniireyaaya, kankuru pooti ohikhuma naanaanoru; masi navekelaru, vano ekumi ya kankuru enookhuma. Nyuwo pooti owereiwa nlelo, ni—ni” miyo khwira, “nyuwo pooti woona ekhurunuwelo naanaanoru.” Ni miyo khwira, “Vano nuuvira mahiku vakhani khino pooti owereiwa ntoko sihinatoko anyu.” Masi miyo khwira, “Muhaana ohela waamini wanyu voonvirikanya kankuru.” Miyo khwira, “Kankuru uwo akhala vale, munimookhwa. Kankuru akhwa vale, munookhala mukumi.” Nto miyo khwira, “Vano ninoovekela.”

³²⁷ Nto hiyo khuvekela, nto ni khula eyooniheryo koonaly’aka, Muluku aahikwannya erutthu ya muthiyany’owo. Nto naanaanoru owo khuvona, owo khurowa waathotola ame aka, khwaathotola anawaattamanani, (okathi owo aaryaawe moohaawani ntoko mmo) khaarina hata owereya. Vano nto vaviraly’aya mahiku oophiyaka mararu owo khupacerya owereiwa-tho.

³²⁸ Vano nto khurwa osuwela wira muttethe ene waairale wira awo “yaamuliva ekontha ya meetiku, meetiku aamooperanri-ru.”

³²⁹ Nto vano miyo kavonya vale, Muluku akilevelele. Masi awo khimukuxa mai ule mmiravo, khumpaka “epila” yoowo. Awo yaaroomuroiha iwe, khukumihya marupo awe mmirimani, ni sothene. Khukumihya munvira miyoso ni marupo khukumaniha ota, emuthalaka mpararini. Ni yaahikhala vameesa va operasawu iwoora thanu na xexe n’itthu. Nfurumeera khwira, “Vaakhala ntoko nipuro vaniiviwa inama, vaavo awo yaamwaramwaryaaya sa muhina mwawe nipuro nnipuro, khimuhela niphwanya na epalastiku ni ituupu sa epalastiku.” Eyo ti yoowooneya, masi ekeekhahi. Ni marupo a epalastiku ni itthu siiso, nto khimuhya muthiyany’owo ni mukhalelo owo, mai mwaamukhaani. Miyo kinihimya, mwa enamuna aka yo wuupuwela, mameetiku ale t’ottheka wo wiiva.

³³⁰ Owo aahaahimeerya, owo khwira, “Munna Branham ookivekelela.” Ni khwira, “Ninrowa waamini wira kankuru ahu. . . wira kankuru ohookhwa.”

³³¹ Khwira, “Kookhalana mihupi sanyu, ‘Kankuru anyu’ mukumii.”

³³² Aawerya sayi owo ohimya? Owo aari mpuwa, hata raayu xiixi khonwerya ohimya. Kankuru e. . . Khivanweryaneya omuhimya kankuru ni raayu x, owo erutthu, khimunwerya omoona. Yaari etthu emosa paahi yo wira, omukumihya mwa muthiyana ni omuthikilasa kapatti-kapatti. Ti yeeyo tu. Vano owo oryeene mai mwaamukhaani, miyo kaammuhya wira eeherye omwaamini wawe Muluku ohikhanle omwiiraha “epila” ya mutthu siiso. Vano miyo ka—miyo kavonya vale, vakhala wira miyo—miyo kirina niwoko noovonyeya, kintthuna

Muluku akilevelele, moone. Okhala wira nkinththuna wira nyuwo muupuwele wira miyo nkinaamini operasawu wala nkiniwaamini mameetiku ni itthu. Eyo eri saana. Masi miyo kinoona wira mwaahaana osuwela etthu eniir'anyu muhinatthi omuthipa mutthu, kahi waarumeela awo ntoko wehererya siiso. Ti yeeyo. Nto vano, vekeekhai, owo khonwerya okhala. Ti yeeyo tu. Owo akhala-ru mukumi, vekeekhai nookhala mmosa wa miiriirya suulupalexa sitonko okhumelela. Okathi muthiy'an'ole owenhe-awe vathi khoona wira marupo awe epantte emosa, ni isyo sawe saahaana ovara muteko epantte ekina, owo aarookhileya *sa*, ohileya. . . Vano, khiyaari etthu. . . mwaamukhaani uwo aahimalamala. Mai paahi aarina ntoko miyaakha miliko miili ni miili wala miloko miili ni mithanu ni aana araru wala axexe akhaani wira aalele. Etthu yookhupanyereyaxa kitonko aka wiiwa kookhalaru. Miyo khwira, "Mwa enamun'aka yo wuupuwela, meetiku oottheka mwaha wa. . ." Vakhala wira aamukunxe muthiy'an'owo wira amwehererye paahi mwaha wo wira epooma yaarowa oliva, vano ti yoonanara, khiyaakhanle ootthuniheriwaka.

³³³ [Munna mmosa onookoha sinto Muluku ookhala oomulokihaka muthiy'an'owo—Mol.] Ahe, kinimooleelani, munna, kahi yoohiweryaneya. Ni ti—kehiyo. . . Ti—ti yooweryaneya, ni yoohihovereya. Okhala wira kinnisuwela ya mulopwana mmosa waamuhaleela moonoo mmosa, oCalifornia (nyuwo othene mwaahisuwela eyo muxornaaleni), khuvekeleliwa, ni moonoo *ola* waari woothikileya mpakha *va*, khukhala wunnuwaka mpakha ikatha omelela-vo olole; ekokwino khunnuwa, nresa, ntata, ni ipantte sa munlupanyana ikatha opakeya mukathani, moone. Eyo eri, kookupali wira ti, *Namalaleya a Waamini* khula mweeri. Hata owo akhalana matata awe amukhumme *sa*, vannooneya nipuro moonoo awe waathikileiye-aya, vaavo vannunwaaya. Khula mweeri ennoonihiwa moota onnunwaaya, mwa mwaakha ntero.

³³⁴ [Munna onoolavula-tho—Mol.] Tthiri, ti yeeyo. Miyo kinnaamini. . . Eyo—eyo—eyo etthu yoorikarika, moone, eyo etthu yoorikarika saana. Imaara kamosa-kamosa kihiiwa. Vano, ni Munna Bosworth, owo aahinvekelela muthiyana mmosa ohiyu umosa. Ni miyo kaahikhalana mmosa vamuthukumanoni vaka. Masi a Munna Bosworth aahivona naanaanoru; awaka aahipisa vakhani wira yiireye.

³³⁵ Owo aahinvekelela muthiyana mmosa. . . Vano, miyo kisomme onamoona wa muthiy'an'owo. Aarina kankuru, khaarina ephula; aarookhuura ephula awe. Nto voosiisu aya muthiy'an'owo khukhalana ephula. Vano, miyo koosuwela ela. . . Vano, owo t'a Munna Bosworth, muliivuruni mwawe eniihaniwa *Kristu Mpenuxa*, kookupali, ahiiso, *Ole Oniruwaha Ohakalala*, mmosa. Vano, eri mwa onamoona wa muthiyana, ni nsina nawe ni onkhalaawe. Ni owo ookhalana anawaattamanani

ni mameetiku ni itthu sothene sikina wira elipiherye, wira ehiiraneya.

³³⁶ Vano, oLittle Rock, Arkansas, ohiyu umosa musaala, miyo kaahivekela iwe...kahi Little Rock, masi oJonesboro. Kaavekenlyaaka...Miyo khwira, "Kinrowa okhala mpakha kinvekelele mutthu ookiserya." Kaahikhala mahiku mathanu na mararu othana n'uhiyu vaplataforma, moone. Vano nto...nto musaala aahikhala muthiyana mmosa aarwiye, aarina nleeso nawe vasulu so, nto miyo koono wira aamunla. Nto miyo khwira...Oh, kinoona wira yaari iwoora piili wala tthaaru voosisu, miyo khwira, "Muhinle, munna, Muluku ti Mpenuxa."

³³⁷ Owo khwira, "Miyo nkininla, Munna Branham." Owo khukumih; owo khaarina ephula, moone. Mameetiku yiirale... Kankuru aahikhuura mpakha nikhuva nooteela mwa yoowo... awo yaamooniherya. Ni miyo kaahinkelele, ni khwaavekela Apwiya wira envonihe.

³³⁸ Nto isumana soophiyaka xexe wala thanu okhuma vaavo, kaari oTexarkana. Nto aahikhala mulopwana mmosa ooreera murima oowara saana aakilaanthe vale, owo khwira, "Kaamuwerya okhalana nuulumo nimosa paahi, Munna Branham?"

³³⁹ Omalakarū ovenya vaplataforma, mmosa w'alipa-ookhaliherya khuphavela ommaaliha. Miyo khwira, "Ahe, nrowe noone."

³⁴⁰ Owo khwira, "Nyuwo munnimusuwela mwali ula?"

³⁴¹ Miyo khwira, "Nnari, nkinimuupuwela."

³⁴² Owo khwira, "Nyuwo mwaawenhe-ru elatarato ela mwaammusuwela." Nto owo aari namwiiva ixikokho o—oTexarkana, ni awo yaari ame awe ni ephula esya yaannunwe, yoopakeya saana ntoko ele ekina.

³⁴³ Vano eyo enoorowa wooniherya wira Muluku...Miyo kihoona wiiriwa. Vano, Muluku aamuwerya omwiirela yeeyo Muhano Harvey. Ni kinvekela wira Owo aire, okhala wira mwaamukhaani uwo oohaawa onnitthuna okhala.

³⁴⁴ Munna Tony, mookhalana etthu y'ohimya?

[Munna Tony onihimya ovonihiwa—Mol.] Ti yeeyo.

Amen. Amen. Ayo, ti yooreera, nave. Ayo, Owo vekeekhai onimwiira, Owo ti Mpenuxa.

[Munna mmosa onlavula ni Munna Branham—Mol.] Ayo. Ayo. Ayo, munna. Amen. Vekeekhai. Ayo.

³⁴⁵ Miyo kookupali...Ahe, kinroromela wira Muluku onimoolokiheryani yeeyo, mwan'aka, wira mukuxe mutthikaka mwamoonihe. Eyo ekeekhai tu. Ti ya onamoono wa ovuwa wa Muluku, kinvekela wira Muluku aire. Oh, Owo—Owo... Vakhala wira Owo Mulukuu Oowerya sothene, Owo onniwerya

wira itthu sothene. Aahiweryeke wira, itthu sothene, Owo kahi Muluku Oowerya sothene.

³⁴⁶ Yookhala etthu enikhalinhe hiyo ele ekhanly'ahu, mwa enamuna hiyo nikhany'ahu, ahiiso naamwiira nikhalanne mu—muru ntoko mwaapalame, wala etthu siiso, ahaakhanle Namapaka ottuli wahu wira omukhalihe khula mmosa a hiyo ni ekhalelo emosa, wira opake mwiri karvalyo, mwiri wa aalamu, mwiri wa makutthi, ni—ni ovirikaniha seiyo—ru yeeyo—yeeyo sikhany'aya. Onipaka hiyo kahi ni . . . akina ni manri, nto akina ni mapururu, ni akina ni makhuli, wira nyuwo . . . Moone, eyo—owo Namapaka ottuli wa yeeyo, o—oneettiherya yeeyo. Vekeekhai Owo orina itthu sothene mmatatani mw'Awe. Ni miyo koosuwela wira Owo onniwerya wira itthu sothene. Ni hiyo ninoovekelela, ninoovekela.

³⁴⁷ [Munna mmosa onlavula ni Munna Branham—Mol.] Vaalikana. Nookhalana . . .

³⁴⁸ [Munna Snyder muthiyana oniira, “Munna Billy, muswammaha.”—Mol.] Ayo, muthiyana, eyo eri saana, mukeleleke ohoolo. [Munna Snyders muthiyana onihimya wira oovonihwiwa okathi Munna Branham onvekelenlyaawe Ettiminku evinre.] Amen. Nyuwo moosuwela, miyo kaahikhala kuupuwelaka, Munna Snyder, emara emosa okathi weemenly'aka va ni muttikitthelo ole, miyo khuupuwela . . . Kimuleela Munna Cox, miyo khwira, “Nkinrowa—tho hata wehererya mithukumano iye sa olamula sa mmurimani mutapernakulu.” Oh, nyuwo khamunsuwela moota xetwani onikihooxaawe, munna. Moota—moota owo oniiraawe! Moosuwela, okileelaka mwaha wa soolamula iya sa mmurimani.

³⁴⁹ Nto va, kirimwiira oosuwela wira muhima awe Muhano Wood va . . . Kiira kihinatoko omoona hata mmosa w'atthu aya. Nikhuru n'awo yaavonihwiwe okathi ene yoowo, nto atthu othene . . . Vano, moosuwela, yaari epursento yuulupale y'atthu ale yaavonihwiwe. Nto nuumala e . . . Etthu yootikiniha vano: muhima awe, miyo kaahilya y'ohiyu ni yoowo ohiyu umosa, mwa isumana soophiyaka piili eyo ehinatthi, . . . Oh, muhina wu mmiyaakoni oKentucky, ni miyo—miyo koosuwela wira aarina nsu ntoko Muhano Wood, ni khuwooneela vanci-ene mpaani. Ni miyo nkaamucalanxe owo khula enamuna, kaari, kaalavulanxe n'aiy'awe, owo aahitthokiha yolya y'ohiyu. Vano hiyo khukhuma khukilaathi khulya; khutthikela ovolowa, miyo khulavula n'aiy'awe, khumaliha khukhuma. Nto Muluku Yoowo okhanle Mphuki aka muulupale onnisuwela (keemenle ene vapulpitu va) miyo nkaamusuwenle muthiyan'owo.

³⁵⁰ Vano nto vamanlyaaya muteko wo ovoniha, miyo kaahiihana waltaari wira anatampi erukunxe murima. Ni owo aahikhala oowisoona vanci-ene ni Yeeyo; vano owo khurukunxa murima ni khuvahererya ekumi awe wa Kristu, khuvenxa ntata wira

aanvahererya ekumi awe wa Kristu, ni aamunla. Muttikitthelo wothene nuumala orowa, kiihanaka waltaari, ni siiso. Vano nto miyo khwiira oorukunuwa, nto va yaari yoowoona, vano kaahimoona murokor'awe; yoowo aari munna mmosa muthiyana, ola aari murokor'awe, n'awo vamosa.

³⁵¹ Nto miyo koono wira aari mwaara a Charlie, okhala wira miyo kaamusuwenle okilaanthe-ene vameesa nihiku nlo, ohitto iwe o—owannyawe Charlie... Amwaar'awe akhaani, mwaamukhaani, Apwiya khukooniha mulattu owo aarinaawe. Nto okhuma okathi ene yoowo, Apwiya khukwannya erutthu awe okalaanthe-ene vale vameesa vawe naanaano va. Tony, vaavo naary'ahu-vo, ohitto iwe, naaronwe oxaya ikhopa. Vano Apwiya yaahikwannya erutthu awe khukumiha etthu ila owo aarinaawe owaraka sothene... mwa ekumi awe yothene, mwa yoowo; okilaanthe-ene vaavale tu. Nto mwaamuthiyana owo aahaana kweekwe olya epantte ekina ya meesa, masi olelo, owo ohaattamela, khuhela ekhatera awe, ni khulya okaattamenle. Owo khaasuwela etthu iiraawe. Aiy'awe akilanthe-ene sa, ni Munna Banks aakilaanthe vale, ni hiyo nivaanelaka. Vano owo khurukunuwa, khukuxa ekhater'awe, khupweha va mpararini mwaka. Ni yaari mwaha wa niwoko, Apwiya yaahooniherya yoowoona vaavale vale. Vano miyo khuwiihana aiy'awe, okhala wira waari mukattiyamiho wa muthiyana, kipacerya omuleela etthu yaakhumelenle. Owo khwira, "Munna Branham, eyo vekeekhai t'inamuna yiiraneieye aya, vekeekhai siiso." Vano vale owo khimuhimeerya, nto Apwiya khunvonihana. Vaareera.

³⁵² Vano nto vaamanlyaaya muteko ohiyu uwo, nto munna ola mukina, kaahimoona mmirav'ola Charles ni muthiyan'ola vamosa. Miyo khuupuwela, "Ole siiso oryeene mwaar'awe; masi amwaar'awe t'otteela maihi, nave ola muthiyana a maihi ooriipa." Nto khwiiraneya oweha wira yoowoona yaaheetta vanloothoni nno. Vano owo aakilaanthe vale akukutthaka maitho awe vano Apwiya khooniherya yoowoona owo vaamanlyaawe okhala... wiihana wa waltaari... waamanlyaaya muthukumano wa mavekelo, ovonihiwa w'aretta, ni wiihana waltaari waahiiriwa, vano Muluku aahilipelela mpakha owo orukunxa murima khuvahererya ekumi awe wa Yoowo vano nto khurukunuwa khunvonihana. Ni owo aahikhalana... mikattiyamiho sawe saahimwiihiha owo mwa miyaakha. Nto wiipiwa iwo khurowa vathi-xa, ni sothene, mpakha inawu sawe ophunyala vaavo saavikanne-aya (iveneno) erutthu awe. Onnoona saana ovikana sitonko awe woona mwa miyaakha, moone. Ni moota Apwiya ni mahala Aya oothamaleya anii'aya yeeyo! Kinoona wira eyo ti ya wahala; kahi siiso, Munna Wood? Ni moota Awo anii'aya! Nuumala... Munihimya-ni? [Munna Wood muthiyana oniira, "Owo oovukuwa ikhiilu piili ni ikharaama imiya piili esumana yookiserya."—Mol.] Ikhiilu piili ni ikharaama imiya piili mwa

esumana emosa. Oh, Owo Mulukuu, kahiyo?

³⁵³ Vano, miyo kinimooleelani, etthu kimuhimeerenlyaaka Munna Neville. . . Miyo koonna wira khino owo aahikhalana mutthaka w'ohiy'ula. Owo khwira, "Nnari," khaarina. Nto miyo kookhalana sookoha kamosa-kamosa va saahanle, kihoona voolakeya okhanyerereya orwa va ni waakhula sookoha iya. Nuumala kihaana piili wala tthaaru sikina khino kihinrowaaka ophiyerya ohiy'ula.

³⁵⁴ Kintthuna waakhula kamosa-kamosa kinammalaru ovahiwa sa mulaleyi mmosa. Munna Neville paahi, ahiiso, Beeler onoomalaru okiruuhele. [Munna Branham onnaakhula sookoha thanu na tthaaru sinttharela mwa Mpantte III, ntoko sookoha 67 mpakha 74—Mol.]

Maluku anthoonyerya exeeni mwa Wiisuupulula 21:19 ni 20?

Muleliherye inama xexe sa Wiisuupulula 5. . . Owo onihimya 6; kahi Wiisuupulula 5, ti 6, woona waka.

Ni t'ani akhanle mahumu miloko miili ni maxexe?

Nliinya nooxeerya na Maphattuwelo 38 nnihimya-ni?

Soovaha xeeni sinveleelihiwa mwaha wa okhwa w'anamoona aili, Wiisuupulula 11?

Anrowa okhala vayi masantu nuumala olamulela wa miyaakha ekonto emosa? Ni muthinto xeeni w'erutthu awo anrowaaya okhalana?

Ninrowa ophuka sayi malaikha?

Maihi ankhala exeeni mwaha wa malaikha a aKorinto Oopacerya?

³⁵⁵ Olavulaka kamosa-kamosa sooreera, iyo ti sooreera saana. Alakela nkinrowa waakhula iyo ohiyu yoola, masi Apwiya yatthuna vale, kinoophavela waakhula okathi mukina ninrweelaahu yeeyo.

³⁵⁶ Kookhalana kamosa-kamosa sooreera mu ohiy'ula; tivo ninrowa ovekela vano ni naavekele Apwiya wira enikhaliherye, nto ninookelela seiyo, oh, minuutu miloko miraru ni mithanu, miloko mixexe sinttharelana.

³⁵⁷ Vano, Tithi a Wirimu oottotopeliwa, hiyo ninnooxukhuruni Nyuwo mwaha wa sothene Nyuwo sinniireny'anyu. Ni, oh, ti yoothamaleya moota mahala Anyu aniphienryaaya. Kinimuupuwela vano, ohiyu uwo, ni mwaapara aka ole mwaamukhaani, oh, ahaareere owereiwa, vano Nyuwo khurwa vanlakani. Ehooma awe khupacerya ovukuwa okhuma okathi ene yoowo, ni yoomalamala vano. Kinnooxukhuruni Nyuwo. Ni e. . . kinvekela paahi wira Nyuwo mukhale ni khula mmosa ovekenle yoovekela ohiy'ula. Ni ninsuwela vakhani, etthu enihimya, nivekelo naamukhaani, mpakha ophiya owannyihu. O Muluku, exeeni. . . moota—moota Nyuwo munkhal'anyu

eekeekhai. Okathi ene yoowo meetiku onrowaawe okhuma, airaka, “Miyu nkisuwenle, nkinatoko woona etthu wira ntoko yeeyo,” vano nto Pwiya Yesu mukele vanlakani.

³⁵⁸ O Muluku, Nyuwo mwa eekeekhaixa wa hiyo, ni hiyo ninnitteeliwa murima saana mwaha wa yeeyo. Hiyo ninvekela wira munilevelele onyonyiwa wahu wothene, ni inamuna sahu s’elolo. Ni, oh, munuupuwele paahi, Pwiya, wira hiyo na erutthu ya mutthu molumwenkuni mw’epiphi, olumwenku w’epiphi ni evitikavitika. Ni ninweha ovira mw’ekuwoni, p’uhimya wene, owiitho wahu, ni hiyo ninoona paahi ni ninsuwela ntoko siniiraahu v’omutthu nno. Masi nihiku nlo okathi ekuwo eyo enkumihiwaaya, ninoorowa owoonani Nyuwo ethoni ni ethoni ni ninoosuwela ntoko sinsuweliwaahu. Nlo ti nihiku ninwehereryaahu.

³⁵⁹ Hiyo ninnivekela Tithi, vano, wira Nyuwo munikhaliherye okathi hiyo omphavelaahu waavaha atthu Masu a Muluku, vootthariha soovekela saya. Mukumihe iretta sothene mwa hiyo. Hiyo ninoophavelani Nyuwo, Pwiya. Ni ninvekela wira Nyuwo munivahe. Omoriwa Wanyu ikharari nivahiwe hiyo, tthiri ninvekela mwa Nsina na Yesu. Amen.

³⁶⁰ Vano, mwa waakhula sookoha, nkhiyo oosuwelaxa mulaponi, moosuwela. Masi kinimwaakhula paahi vooreera sinsuwelaaka.

³⁶¹ Va yaari emosa kaapacenry’aka ohiyu uwo, ni kaahaana weemela:

60. “Mwa Erooho emosaru hiyo othene noopatisiwa mw’erutthuni ya Kristu.” (Nyuwo othene munnuupuwele wira eyo ti yaari yookoha miyo kaaryaa-vo. Vano eyo eniphwanyaneya, vekeekhai, mwa aKorinto Oopacerya 12). . . **Okathi hiyo ory’ahu . . . onaakhelaahu oyariwa vasya, ela enimwiiraneya. Ola ti . . . Ola Opatiiso wa Erooho Yoowaarya, wala wookhala opatiiso ohoolo waya, wala iwo osarihiwa?**

³⁶² Vano, ti yookoha yoothamaleya, ni naamuwerya oviriha okathi ahu wothene mwa yeeyo, nto ohiy’ula ni meelo ohiyu ni siiso. Yaamukhuneela . . . yaamu—yaammukuxa ni omutthukaniha Bibiliya othene vamosa. Khula Yoolempwa ehaana otthukwana oratteene ni khula Yoolempwa ekina mBibiliani.

³⁶³ Masi weererya paahi okhaliha yoowaakuvaxa, voowooneyaxa ntoko sinsuwelaaka okhaliha, nnari; mwaamwaaminiki Pwiya Yesu Kristu, nyuwo nto munimwaakhela oyariwa vasya. Mwaawaaminiki Apwiya, munaakhela muupuwelo musya, ekumi esya, masi kuhiyo Opatiiso wa Erooho Yoowaarya. Munnona? Nyuwo munaakhela oyariwa vasya okathi munaamini anyu, munaakhela Ekumi Ehinimala. Eyo ti yoovaha ya Muluku nvahiwaanyu ni mahala

w'otthuna mwaha w'okupali yoovaha Muluku onoovahaaweni. "Ole—ole oniiwa Masu Aka ni onimwaamini Ole okirumme, ookhalana Ekumi Ehinimala." Ookhalana Ekumi ehinimala; iwo ti oyariwa vasya, moorukunxiwa murima, enihimya wira "muroorukunuwa."

³⁶⁴ Masi Opatiiso wa Erooho Yoowaarya onoohelani mw'erutthuni mwa Kristu, oowiiwelela soovaha sa muteko. Eyo khenookhalihaxani muKristu, eyo enoohelani paahi mw'erutthuni ya soovaha. Munnona? "Vano, mwa Erooho emosaru" (aKorinto Oopacerya 12) "hiyo othene noopatisiwa mw'erutthu emosaru. Vano," onihimya ti Paulo, "sookhala soovaha soovirikana, ni mw'erutthuni mu siri soovaha thanu na xexe sa erooho." Ni mw'erutthuni mu . . . Muhaana opatisiwa mw'erutthuni wira mukhalane emosa wa soovaha iya. Iyo sinrwa ni erutthu.

³⁶⁵ Masi, vano, vanaasiwa okhalana Ekumi Ehinimala ni okhala muKristu, nyuwo mwa muKristu okathi munaamini anyu. Vano, eyo kahi wiipaka waamini, eyo vekeekhai ti omwaamini Pwiya Yesu ni omukupali Yoowo okhala Moopoli anyu yeenyu; nyuwo muniyariwa vasya vaavo vo, ni mookhalana Ekumi Ehinimala. Muluku onookela mwa nyuwo.

³⁶⁶ Vano nwehe, Ekumi Ehinimala; Yesu ohimmye wira, "Ole oniiwa Masu Aka ni onimwaamini Ole okirumme, ookhalana Ekumi Ehinimala, vano khanrowa olamuliwa masi oovira mookhwaani khuphwanya Ekumi." Nyuwo mwa yoopattuxiwa esya okathi ene yoowo. Vano Paulo aahikumana n'atthu kamosa-kamosa yaawo, mwa Miteko 19. Awo yaahikhalana mulaleyi weiwe yoowo aari mulapeli aarukunxale murima aihaniwa Apolo. Nto Apolo aari mutthu oowerya mwa Soolempwa, ni owo aamooniherya ni Soolempwa wira Yesu aari Kristu. Munnona?

³⁶⁷ Vano nwehe. Apolo, mwa Masu, ooniherya ni Masu. "Waamini onrwa mwaha wo wiiwa, wiiwa Masu. Ole oniiwa Masu Aka, ni onimwaamini Ole okirumme, ookhalana ekumi ehinimala." Munniwa saana? Apolo, ni Masu, aamooniherya. Ni ala yaari aKristu, awo yaari anamatthara, awiixutti. Nto Apolo aamooniherya ni Masu, wira Yesu aari Kristu. Ni awo yaanikhalana otthapa wuulupale ni yaahaakhela Masu, nnakhala vo asuwelaka paahi opatiiso wa Yohani.

³⁶⁸ Nto okathi Paulo oviraly'awe mmittettheni sa wEfeso, khwaaphwanya awiixutti ala nto owo iirale, "Muhaakhela Erooho Yoowaarya *okhuma* okathi mwaaminni anyu?" Munnona?

³⁶⁹ Vano, okathi munaamini anyu, Yesu ohimmye wira, "Mookhalana Ekumi Ehinimala." Iwo ti oyariwa vasya. Iwo orukunxa wanyu murima, orukunuwa. Masi Opatiiso wa Erooho Yoowaarya ti owerya wa Muluku mpatisiwaanyu-mo ni oowiiwelela soovaha iya thanu na xexe sa erooho wira

sivareke muteko mwa nyuwo; ntoko, olaleya, anamalaleya ehapari, arummwa, amukukhula, maprofeta, . . . ni soovaha sothene sa erutthu sinkela mwa yeela, okathi onipatisiwaanyu mw'erutthuni mu. Nto eyo ti . . . khenookhalihani oonvikana muKristu, eyo enookhalihani voopuroni paahi nipuro wira mukhale erooho enrumeela Mukereja mwa Muluku mukumi. Vano munniwa saana? Munnona?

³⁷⁰ Vano yookoha ti . . . Nrowe naakhule emosa emosa, sookhala sookoha tthaaru.

“Mwa Erooho emosaru hiyo othene noopatisiwa mw'erutthuni ya Kristu.”

Eyo ti yoolikana, aKorinto Oopacerya 12 anoovaha yoowaakhula ya yeeyo. Vaareera.

Okathi ene yoowo hiyo onaakhelaahu oyariwa vasya, ela enimwiiraneya? Owo p'ukathi ene?

³⁷¹ Ti yeeyo awo anthhun'aya osuwela, ayo. . . “Mwa Erooho emosaru. . .” Nnari. Nnari. “Mwa Erooho emosaru hiyo othene noopatisiwa mw'erutthu emosaru.” Moone, owo kahiyo okathi oyariwa vasya ompaceryaaya, oyariwa vasya ompacerya okathi *onimwaamini* anyu Pwiya Yesu.

³⁷² Vano moone, khekhanle e . . . khekhanle hat'etthu emosa. . . Vano nwiriyane. Exeeni mukhanlyaanyu wiiraka woohikhala waamini? Exeeni-tho mukhanlyaanyu wiiraka? Exeeni mukhanlyaanyu wiiraka ya yeeyo woohikhala waamini paahi? Mukileele etthu emosa mwaakhanlyaanyu wiiraka. Khiivo etthu emosa mukhanlyaanyu wiiraka woohikhala waamini Yeeyo. Vano, yakhala etthu enrwa yoohikhala waamini wanyu, kahiyo yoowiira anyu yeenyu, ti yoowiira ya Muluku. Tivo. . .

³⁷³ Vano hiyo nahimya wira okathi nyuwo. . . Imaara sinci-ene miyo koowoona, imaara sinci-ene, atthu akupaliki “eyooniheryo yoopacerya y'olavula ilavulelo” ntoko Erooho Yoowaarya. Nto imaara sikina waattikinya atthu, wala waamana ni waamana nikhata, yiiraka, “Muhimye. Muhimye. Muhimye. Muhimye.” Nyuwo moosuwela, otthikela nuulumo nimosa imaara soowaatta, “Muhimye. Muhimye. Muhimye.” Moone, eyo etthu nyuwo muniir'anyu mmansinyu. Ni—ni—ni eyo kheni. . . eyo kheni. . . eyo—eyo kehiyo hat'etthu. Nyuwo pooti ophwanya mawoowo a ilavulelo. Pooti okhalana e—itthu sinci-ene, ni miyoonelo. Masi etthu yarwa woohikhala waamini wanyu, ehaana okhala yoovaha y'eMuluku ya Muluku nvahiwaanyu. Munnona?

³⁷⁴ “Nto mwa Erooho emosaru hiyo othene noopatisiwa mw'erutthu emosaru.” Eyo ti yoolikana, moone. Opatiiso wa Erooho Yoowaarya eyiirelo yoovirikana ni oyariwa vasya. Emosa oyariwa, emosa opatiiso. Emosa enoovahani Ekumi Ehinimala, ekina enoovahani owerya. Enoovahani owerya mw'Ekumini

Ehinimala, moone, wira evareke muteko. Vano muhiiwa saana? Ayo. Vaareera.

³⁷⁵ Vano va yookhala ekina, enrwa yaneeili, yoomalela oreera kaarinaaka ohiyu ule:

61. Erooho ya Yesu yaari vayi mahiku mararu erutthu Awe yaaryaaya mmahiye? Erooho Awe yaari vayi?

³⁷⁶ Vano, erooho Awe, nyuwo mwatthara-ru Soolempwa, . . . ahe, naamuwerya paahi oruuha mapuro manci-ene. Masi, kintthuna osuwela, t'ani orina Bibilia? Munna Stricker, mookhalana Bibilia? Vaareera. Munna Neville, mookhalana? Mukiphwanyerye Masalmo 16:10. Nto t'ani mukina? Munna Wood, mookhalana Bibilia vo? Ahe, Munna Stricker, (vaareera, mmosa mmosa), nyuwo mukiphwanyerye Miteko 2:27, Miteko 2:27.

³⁷⁷ Nto vano, yoopacerya, okathi Yesu okhwiyaawe. . . Mwakhwa vale, erutthu anyu enimookhwa. Nuulumo *okhwa* nnihimya “ovalana,” wira nvalaanihiwe n'ale oophentiwa anyu. Masi va Owo ohimye ela, mwa Yohani Oowaarya, kapiitulu 11, “Ole oniwa. . .” Kahi. . . Kileveliwewe; eyo ti mwa Yohani Oowaarya 5:24, “Ole oniwa Masu Aka ookhalana Ekumi Ehinimala.”

³⁷⁸ Yesu aamuhimeenrye Marta, ole aarwiiye okumana ni Yoowo, . . . Owo iirale, “Nyuwo mwaari vaava, murokor'aka khaakhwa. Masi hata naanaano va, sothene Nyuwo sintthun'anyu onvekela Muluku, Muluku onimoovahani.”

³⁷⁹ Owo khwira, “Miyo ki Ohihimuwa ni Ekumi.” Munnona? “Ole onikaamini Miyo, hata onakhwaaru, onookhala mukumi; ni ole orina ekumi ni onikaamini Miyo, khankhwa-tho.”

³⁸⁰ Vano—vano, yookhala epantte ya hiyo ehinkhwa. Ni okhala wira kinoomalaru ovira mwa Soolempwa, sothene sirina epacerelo sookhalana emalelo. Ti itthu iye sihirina epacerelo, sihirina emalelo. Tivo okathi onimukupaly'ahu Kristu, Muluku, hiyo ninkhala aana alopwana n'athiyana a Muluku, ni Ekumi ahu ti yoohimala siiso Ekumi ya Muluku eryaaya yoohimala; hiyo ninkhalana Ehinimala.

³⁸¹ Vano, nuulumo *mahiku othene*, hiyo noovira mwa yeeyo. Nuulumo *mahiku othene* ti “evirelo y'okathi,” mahiku othene *ni* (etakaniheryo) mahiku othene. Ni nihoona va wira yookhalana—yookhalana emalelo, ntoko ohaawa wothene, ni iretta sothene, ni mixankiho sothene, ni ehukhumu yothene, ni omooroni wene wookhalana emalelo.

³⁸² Masi Ekumi Ehinimala kherina emalelo, okhala wira Eyo khiyaarina epacerelo. Eyo khenkhwa okhala wira Eyo khenatoko oyariwa. Eyo khiyaarina epacerelo ya mahiku, kherina emalelo y'okathi. Vano, enamuna emosa paahi nikhanyaaahu okhalaka Voohimala, onkhala ni waakhela etthu

ekhanle Yoohimala. Ni Muluku aari; ehinatthi okhala hat'etthu, aari Muluku. Muluku khonakhalaneke epacerelo wala emalelo.

³⁸³ Ni Muluku aari Erooho ela yuulupale. Hiyo noomuthoonyerya Yoowo ntoko ma—makhwili mathanu na maili a ekhweyi ankhuneela . . . Nttheke naamukhuneela elapo nahaaphiyenrye elapo. Awo maasi paahi epakaka munela wa evilikeyelo ya elapo, enkhalaha. Masi, vano, ntoko Muluku siryaawe Oohimala, ni Owo aari Ooloka voomalela: ophenta wooloka voomalela, murettele wooloka voomalela, ohakalala wooloka voomalela, otteeliwa murima wooloka voomalela. Irooho iye sothene thanu na piili (ntoko ninooonaahu mwa Wiisuupulula), iyo saahikhuma; ti seiyo saamukumihenrye Muluku, waari oloka voomalela. Itthu sothene sikina ohiya yeeyo enkhalaka etthu ehononiwe okhuma mwa Yeeyo.

³⁸⁴ Vano enamuna emosa paahi nikhanyaahu otthikelaka oloka voomalela, otthikela ottuli ni Yeeyo (oloka voomalela, okhanle Muluku). Vano ninooophiyerya oloka voomalela, vano ninkhalana Ekumi Ehinimala; yoohikhalana emalelo, wala yoohikhalana—yoohikhalana hat'etthu, eyo Ekumi Ehinimala paahi.

³⁸⁵ Vano owo onlavula sa munepa . . . erooho. Maana hiyo ninroiha irutthu sahu mmahiye wa ole ookhalaxa oowaarya a hiyo, a erutthu ila. Nto erutthu . . . Yoopacerya, okathi Muluku, Logos yaakhumme wa Muluku . . .

³⁸⁶ Ahiiso, ntoko sivrilyaaka mwa yeeyo, aKatolika aniihana Eyo, “omwaana Woohimala a Muluku.” Yeeyo, ntoko sihimaly'aka khalayi, nuulumo nlo hata khanirina maana. Moone, khivanweryaneya okhala mwaana Ohinimala, okhala wira mwaana aahaana okhalana epacerelo. Vano siiso Yesu aahikhalana epacerelo, Muluku khaarina epacerelo. Munnona? Masi Mwaana aari e . . . kahi omwaana Woohimala, masi Mwaana aari ni Atithi wopaceryani aari Logos yaakhumme wa Muluku.

³⁸⁷ Ni yaari eteyofaniiya ya Muluku yaakhumme. Mukhalelo wa mutthu wahaarina maitho ntoko nyuwo sinoonaanyu; niitho nooreera. Khiyaarina maaru ntoko nyuwo siniiwaanyu, masi yoovikana wiiwa. Moone, Eyo yaari eteyofaniiya, ni, ekhweyi ila yothene yaahiileva mwa e—eteyofaniiya. Moise aahoona Eyo okathi yaavinryaaya vamwala saale. Owo oonale ipante s'ottuli, khwira, “Yaakhala ntoko mutthu.”

³⁸⁸ Abrahamu aahimoonu Owo okathi Owo aakenlyawe mw'erutthuni ya mutthu khimukhuura mwaanyompe, khiwurya eleethi, khulya manteeka. Abrahamu aahimoonu Owo amalakaru okela, vano nto khulakaseya naanaanoru mwa yeeyo. Hiyo noophwanya wira irutthu sahu sipakaniwe itthu muloko ni thanu na mosa sa vatthayani, iyo sithukumanne vamosa. Ni Muluku aarootakaiha, khuhela Malaikha maili muhina mwa

irutthu iya; Malaikha yeemenle khulavula. Ni Malaikha awo yaari aththu wa emosa . . . ni okathi yoowo.

³⁸⁹ Vano nwehe, hiyo ninnoona wira, Melikhiseteki khaari mukina woohikhala Muluku Mwaneene! Khivaaweryaneya okhala-tho mukina, maana Owo aari Mwene a oSalemi yoowo okhanle Yerusalemu. Owo khaarina hata tiithi nnakhala maama; khaakhanle okhalaka Yesu, okhala wira Owo aahikhalana tiithi ni maama. Owo khaarina epacerelo ya mahiku, nnakhala emalelo y'ekumi; ori Mmosa paahi orina eyo, owo ti Muluku. Aari Muluku akhalaka va muteyofaniiyani. Munnona? Nwehe, Mwene a oSalemi.

³⁹⁰ Vano, Muluku onnikhalaka moovirani w'okathi, mwa aththu Awe. Aari Muluku aari mwa Davidi, aamukalaathinhe vasulu vamwaako, ni ntoko mwene ookhoottiwa, ni wunla. Erooho emosaru yeeyo yaahooniheriwa mwa Yesu Mwaana a Davidi, Yoowo aakhoottiwe oYerusalemu khunla.

³⁹¹ Yosefe, aatumihiwe ni musurukhu miloko miraru w'eparatha, oonyokhiwa ni axinn'awe, oophentiwa n'atithi awe, aakilaanthe moonoo woolopwana wa Farawo, ni khaavo mutthu aakhanle orwaaka vahikhanle . . . ahivinre wa Yosefe, vano nlope naaniruma nto khula nikutha naamukohorela Yosefe: ethoonyeryo yoolikana ya Kristu. Eyo yaari Erooho ya Kristu ekhalaka mwa axilopwana ale. Munnona?

³⁹² Vano, vano va okathi Yesu okhwiyaawe, aari Muluku oowiisooniherya mw'erutthuni. Muluku aaipanke mutthu. Mwa ikano sa ovuluxa, enamuna emosa paahi mutthu aaweryaawe ovuluxa mukhalelo woopweteya wa Isarayeli, owo aahaana okhala mmusi. Owo aahaana okhala mmusi a vakhiviruxa. Eliivuru ya Ruthi ennileeliherya vooreera; ni aahaana okhala mmusi. Tivo Muluku aahaana okhala mmusi a mutthu, wira mutthu akhale mmusi a Muluku. Munnona?

³⁹³ Owo ookhalana erooho mwa yoowo, mutthu ookhalana okathi oniyariwaawe, okhala wira eyo erooho y'ephattu. Eyo erooho ya molumwenkuni, eyo erooho ya mu—muluku a olumwenku ula. Owo mwaana a Atamu paahi.

³⁹⁴ Mwiri oniima mmansaya. Miri siniima mmansaya. Axinama anitothola mmansaya. Aththu aniyarelana mmansaya. Awo ti yoopattuxiwa enikhuma mwa yoopattuxiwa yoopacerya. Munniwa?

³⁹⁵ Vano, vano okathi mutthu oniyariwaawe, owo oniyariwa ni erooho mwa yoowo ya olumwenku ula. Mwaha wa yeeyo owo ohaana oyariwa vasya. Maana erooho ela ekhumme mwa erupalelo ni tiithi ni maama, yeeyo yaari erupalelo ya ekhapa, ni voomalela khiyaawerya okhala voohimala. Tivo owo ohaana oyariwa vasya. Ni owo ohinatthi owerya wira yeeyo, Muluku aahaana okhuruwa ni opaka ephiro wira owo ayariwe vasya; okhala wira owo khaarina hata

enamuna yo wiivuluxa mmansawe, owo aari oohikhalana nrromelo. Owo khaa . . . oohikhalana nrromelo, oohikhalana Muluku, oohikhalana Kristu, molumwenkuni, oopweteya ni oomalalama. Owo—owo . . . khiivo etthu owo aaweryaawe wira wira aisoopole mmansawe. Owo . . . khula . . . Voohicala nkhamana aari namukuttho muulupale, vakhala wira aari pixipu, vakhala wira aari paapa, etthu p'itthu aaryaawe, owo aari oottheka paahi ntoko mutthu aattharelana.

³⁹⁶ Tivo, aatthuneya Mmosa ahaatthenke, wira aire. Nto Mmosa paahi ahaatthenke aari Muluku Mwaneene. Nto Muluku aahaana okhuruwa khukhala mutthu (vano Owo aarwiiye mwa mukhalelo wa Kristu) wira okhalihe mpwino wa okhwa, wira okumihe mpwino wa okhwa, wira onivuluxe, wira hiyo . . . kahi mwaha wa miteko sahu wala mwaha w'oreera wahu murima (hiyo khanrina hata emosa), masi ni mahala Awe, wira noopowe. Vano hiyo ninaakhela Ekumi Awe mw'erutthuni mu enkhwa, nto vano hiyo n'ana axilopwana n'athiyana a Muluku, ni nookhalana Ekumi Ehinimala mwa hiyo. Hiyo n'ana alopwana n'athiyana a Muluku. Tivo, Yesu, oryeene mukumi . . .

³⁹⁷ Ni khaavo mutthu, hata otakhalaka wala oreeraka murima, owo aarine-ene o . . . okathi onkhumaawe elapo ela, owo khokhwiye. Owo ori nipuro nikina. Masi owo ookhalana ekumi enrowa opweteya, nuumala owo onoohukhummwa omooroni mwaha wa miteko sawe, owo . . . masi nlelo ekumi ile ehaana omala. Ori muthinto mmosa paahi wa ekumi Ehinimala.

³⁹⁸ Vano, hiyo noovira mwa yeeyo. Mutthu akhala natampi ni ohukhummwa mahiku othene . . . Owo khokhanle ohukhummwaka mahiku othene voohikhala wira ookhalana Ekumi Ehinimala. Owo akhalanaru Ekumi Ehinimala, ohoopowa. Munnona? Tivo eri enamuna emosa paahi y'Ekumi Ehinimala, nto eyo ti Zoe, "Ekumi ya Muluku." Ni khokhanle opweteyaka.

³⁹⁹ Masi ale ootakhala ari nipuro nimosana no—n'olipelela (moohaaxiwani) ophukiwa waya (wira ephukiwe sithharihiwaka miteko sivariwe mw'erutthuni) nihiku nookiserya. Vano, masi hiyo . . . Itampi kamosa-kamosa sa mutthu sinrowa owo ohinatthi, akina sinimwaatthara.

⁴⁰⁰ Vano hiyo naahimyakaru itampi sahu, Owo naxariya onoonilevelela, tivo hiyo khaninrowa weemela woophukani wa Muluku. Munniiwa saana? Nkawehani, aRooma 8:1, "Tivo khiivo ehukumu enaaphwanya ale ari mwa Kristu Yesu." Ari MWA Kristu. Ale avinre mookhwaani khuphwanya Ekumi; moone, hiyo khanrina ohukhummwa ni naari mwa Kristu Yesu. "Ahineettela makhalelo a erutthu, masi aneettela makhalelo a Erooho." Munnona? "Ole oniiwa Masu Aka, onimwaamini Ole okirumme, ookhalana Ekumi Ehinimala."

401 Nto vakhala wira kookupaliwa mwa Kristu, ni Kristu ookuxa olamuliwa waka, ni miyo kookupali mukuttho Awe w'olivela itampi saka, onwerya sayi Muluku okiphuka? Owo ookiphuka, okathi Owo omphunke-awe Kristu. Vano kootaphuwa ophukiwa. "Vano Miyo koonaru Ephome, kinoovira vasulu vanyu." Munnona?

402 Masi, vano, mutakhali kahi siiso. Owo onrowa nipuro n'ohaaxiwa. Ni hiyo noosuwela wira eyo ekeekhaii. Mutakhali mukumii. Owo ori nipuro noohooxiwa. Owo ori nipuro ohinsuwelaawe...Ti siiso anamalapela minepa ala ni anamakoha minepa aniihanaaya irooho iya s'atthu aronwe, enamuna emosa ya othweela ni iperwa soonanara ni itthu awo ampwexakasaaya, vakhala wira mootoko woona khula emosa wa seiyo. Vaareera. Mwaha wa xeeni? Awo khani... .

403 Nkanweheni Muhano Piper ola, artiiku aka ohinatthi okhumela a *Mwiiriirya wa Donny Morton*. Akavi amusomme artiku uwo? Ayo, anci-ene a nyuwo moomusoma, vekeekhai. Ni owo ori mu *Reader's Digest*. Nyuwo mooweha? Okathi vakhani owo ohinatthi, aakhumme Muhano Piper, namalapela minepa muulupalexu olumwenku otonko aya omusuwela. Makukhu muloko ni manli aheleliwe ehantisi awe. Ni mwa miyaakha miloko mithanu...Awo yaahikhalana owo mulaponi mothene, ni mooniheryo wa siyensiya ni itthu sothene, wira "owo vekeekhai onnilavula n'alipa-ookhwa, nto atthu yaanirwa." Exeeni? Nsina na Muluku khinaaromoliwe hata emaaara emosa, nnakhala orukunxa murima, nnakhala ovoniha wa Muluku, hat'etthu ya Yeeyo, moone.

404 Etthu emosa paahi yaaromoliwe, yaari atthu ale ahimiyaka "Yohani, khamunkisuwela? Miyo ka George kaari nipuro *khata*, ni kiihira *elexe ni lexe ni elexe ni elexe*. Munnuupuwela nipuro nle naaronwaahu khwiira yeela?" Moone, eyo ti yothene awo ansuwelaaya. Awo aarowa. Aavira okhuma...Awo khe—awo khenaahaleela hat'etthu woohikhala ophukiwa.

405 Epantte mwiri onuuramelaaya, ti weiwo ommorelaaya. Ni mukhalelo munkhwaanyu...Mwaha wa yeeyo kinvirikanyaaka waavekelela alipa-ookhwa, moone, olapela wa mavekelo wala—wala waataana wa masantu ni sikina. Khinweryaneya okhala, vootthariha Masu a Muluku. Kheniphwanyihya hat'etthu onvekelela mutthu okhwiye-ene. Awo aamalamala. Awo t'a... awo a...Awo aavira mukaano eriyari ya omoreliwa ikharari ni ehukhumu. Awo ahaakhela omoreliwa ikharari, ahiiso aakhootta omoreliwa ikharari. Yesu ohimye siiso, kapiitulu 16 ya Mawewu Oowaarya, Owo—Owo—Owo ohixutthiha; kapiitulu 16 ya Marku, kookupali wira ti yeeyo. Mulopwana thaaciri ni Laasaru; khaavo mutthu onwerya olapuwa wiixa nno, ni khonkhalakhala olapuwa! Eyo eri vo. Munnona? Tivo eyo ennimaliha mwaha.

⁴⁰⁶ Vano, masi Kristu vakhwiyaawe, sothene saahaana okhalela onamoona wira Owo aari ti Kristu. Vano nrowe nikelele yookoha anyu. Etthu yoopacerya, ittheneeri saahikhootta waarya, nsuwa naahiipitha, mweeri khiwaavanhe waarya waya, elapo yaahoopaa ekhanana miyala saya, wookhwaani Wawe. Vano Owo aahirowa khulaleerya minepa s'atthu saatthukweliwe, yahaarukunxale murima moovilelani wa mahiku a Nowe. Owo, awo yaahaana osuwela. Nkawehani yeeyo! Nto vairaneya wira ookhala natampi mu ohiy'ula, muupuwele yeeyo minuutu mmosa. Nihiku nlo Ehapari yooreera ela muniwaanyu olaleiwa naanaano va, munoorowa okhalela onamoona ni Yeeyo. Nipuro nlo munoorowa okokhora, voohicala wira nyuwo mw'ani. Pooti okhala miyaakha ikonto muloko okhuma olelo, pooti ohikhala mpakha e. . .voosiisu. Okathi p'ukathi, munoorowa okokhora nipuro nlo, ni munoorowa wiiwa Ehapari yooreera emosaru yeela mutthikelaka olaleeriwa.

⁴⁰⁷ Tthiri numala minepa iye saatthukweliwe, sahaarukunxale murima okathi Enookhi ni okathi othene aya yaalaleiye-aya, ni Nowe. . .ni wa ovilela wa Muluku, ntoko siryaaya vano, nilipelelaka okathi yoowo orwa. Ni Nowe ni Enookhi ni othene aya yaahilaleyasa, vano atthu ale yaanaatheyana ni waanyemulasa. Nto awo jaarisa mukalaposo, nto Yesu aahirowa khulaleerya minepa s'atthu saatthukweliwe. Owo aahikhalela onamoona! Erimu yaahikhalela onamoona wira aari Yoowo, elapo yaahikhalela onamoona wira aari Yoowo, omooroni waahikhalela onamoona wira aari Yoowo!

⁴⁰⁸ Bibilia ohimye wira eyo. . .Davidi, miyaakha sinci-ene khalayi, mwa Masalmo. . .Vaareera, Munna, musome Masalmo, xontte. Masalmo 16:10. [Munna Neville onsoma Yoolempwa—Mol.]

[*Tthiri khamunihiya munep'aka mookhwaani; nnakhala khamunimuhiya Oowaarya Anyu wuntta.*]

⁴⁰⁹ Musome etthu emosaru, munna, memmo Petru olaleiyaawe, mwa Miteko, kapiitulu 2, versiikulu 27. [Munna Stricker onsoma Yoolempwa—Mol.]

[*Okhala wira khamunihiya munepa aka mookhwaani, nnakhala khamunimuhiya Oowaarya Anyu wuntta.*]

⁴¹⁰ Musome iversiikulu piili vasulu vaya, munna, wira nwerye ophwanya yoohimya aya.

[*Tthiri Davidi oohimya mwaha wa Yoowo, Miyo kaaniwoona Apwiya okathi wothene ohoolo waka, okhala wira awo ankhala moono aka woolopwana, wira miyo kihikhaleke oowoova.*]

[*Tivo murima aka vantteeliwaaya vanci-ene, ni nlumi naka naahitthapa; hata erutthu aka ennimumula ni ororomela.*]

[Okhala wira khamunihya munepa aka mookhwaani, nakhala khamunimuhya Oowaarya Anyu wuntta.]

411 Musome eversiikulu enttharelana vano.

[Nyuwo mookisuweliha iphiro sa ekumi; nyuwo munookitteeliha murima ni ethoni anyu.]

412 Ayo, nwehe. Vano, mpatthani aka Namoonaa a Yehova, kaatthuna kookoheni yeeyo. Munnona? Omooroni nakhala nipuro, Hades, Sheol, etthu p'itthu entthun'anyu wiihana, vakhala wira eyo emmala vamahiye, vano xeeni Owo ohimya wira, "Miyo nkinihiya munepa Aka mookhwaani, nnakhala nkinthuniherya Oowaarya Anyu wuntta"? Ankhi yeeyo? Munnona?

413 Nno erutthu Awe yaari, mmahiye; nto munep'awe waari omooroni, alaleyaka, mukumi! Ankhi yeeyo? Owo aari muteyofaniyani Mwawe tho. Munep'awe waari vathi vale n'atthu ale yaari muteyofaniyani nave. Vano aawooniherya onamoonaa, wira awo "khayaarukunxale murima moovilelani."

414 Owo...Mwa moolumo makina, Owo aahimana mukhora. Nto mukhora vahuleiye-aya, ni minepa iye sothene saarukunxale murima, Owo iirale, "Miyo ka Osuulu wa muthiyana. Miyo ka Ole Enookhi va..." Oparatiiso, nipuro nikina. Muhikhalakhale muliyalaka mapuro awo mararu, vano: nipuro na ale ootakhala, nipuro na naxariya, ni omooroni wene. Munnona?

415 Vekeekhai ntoko oraaru wa Wirimu, siiso: Tithi, Mwaana, ni Erooho Yoowaarya. Ntoko oraaru wa nxeni: profeta oowootha, nxeni, ni e—ni ekanyeryo ya nxeni. Ni sothene iyo, muupuwele, sothene siri mwa oraaru. Oraaru onnikhaliha emosa, ooloka voomalela. Onkhala ooloka voomalela mwa Mmosa. Nyuwo munkhalihiwa ooloka, mmosa mwa tthaaru: munepa, erutthu, ni erooho; maasi, ephome, ni mitika. Moone, etthu p'itthu mukhanlyanyu, muhaana okuxa tthaaru wira ekhale yooloka voomalela mwa emosa. Mukuxe nipattuuxa na eviituru na malootho mararu muhele vansuwani, munkhalana ekhweyi yoolikana. Moone, itthu sothene, muhaana okhalana tthaaru wira mukhalane yooloka voomalela.

416 Nto vano, muupuwele wira, okathi Owo okhwiyaawe, Owo aahirowa toko khulaleerya minepa sahaari mukhatteya...saari mukhatteya, khukhalela onamoonaa wira Owo aari "Osuulu wa muthiyana." Owo aari "Ole Enookhi aamonalyaawe orwaaka ni ikonto muloko a atthu oowaarya Awe." Owo aahaana okhalela onamoonaa Soolempwa saalaleeriwe ni Nowe, nave ni Enookhi, nave ni anaxariya, wira "Owo aari Yoowo." Sothene saahaana osuwela Yeeyo!

417 Vano Owo aahikhuruwela omooroni, khwaakhela ihulelo sa mookhwaani ni omooroni wa xetwani.

418 Khutthikela oParatiiso; khimuruuha Abrahamu, Isakhi, ni Yakope, ni anaxariya; nto khuhihimuwa (Matewu 27), ni awo yaahikhuma mmahiye khukela mmuttettheni, khwaakhumelela atthu mphironi. Aleluya! Eyo vo!

419 Vano, masi erutthu Awe... Okathi munep'awe waaryaaya nno aahimeeryaka onamoona ale oopweteya, vathi va akuxaka ihulelo wa xetwani, ni ahokolowaka ni amuruuhaka Abrahamu ni Isakhi; munep'Awe waaphwanyaneya mu... munepa Awe waari vathi vale wiiraka yeeyo, nto erutthu Awe yaaphwanyaneya mmahiye. Mwaha wa yeeyo Yesu ohimmy'awe... Atthu aniira, "Ahe, Yesu onihimerya-ni wira, 'Mahiku mararu, Miyo kinoovenxa, mahiku mararu Miyo kinoovenya?' Owo—Owo aakhwiye Namathanu oxekuwa, khuhihimuwa Ttiminku voosiisu."

420 Masi nwehe, waari "*muhina* mwa mahiku mararu," vaakhanle wira mwaaphavenle mutisiyonaariyu a ekereku. Maana Owo aahisuwela wira Davidi, vathi va muttikitthelo (wa muttikitthelo wa Erooho Yoowaarya), aahihimya, "Miyo nkinimuhiya Oowaarya Aka wuntta." Owo aanisuwela wira eyo yaari ya Yoowo. Owo aanisuwela wira yaamuhimya Yoowo. Owo aari Ole Oowaarya a Muluku, ni Owo aanisuwela wira wuntta onkela muhina mwa iwoora miloko mithanu na miili ni piili. Muhina mwa mahiku ale mararu, Owo aahikhuma mme, okhala wira Soolempwa khasikhanle ohononiwaka.

421 Ni khula natiri Mmo onikaasa miyo ni oniwaasani nyuwo, t'awihu!

422 Owo iirale, "Nyuwo mpwetexe erutthu ila, nto Miyo kinoovenxa muhina mwa mahiku mararu." Maana Owo ohimmye wira, "Miyo nkinihiya munepa Aka mookhwaani, nnakhala nkinthuniherya Oowaarya Aka wuntta."

423 Owo aahisuwela, wira muhina mwa mahiku mararu erutthu ile yaamukhuma mme. Owo khaakhanle mahiku mararu oomalela. Nnari, mulopwana, Owo vekeekhai khaakhanle. Owo aakhanle paahi okhuma Namathanu oxekuwa mpakha Ttiminku voosiisu, hata erukuruku emosa y'erutthu ile khiyaaweryaneiyee wuntta.

424 Vano Owo aahikhwa, khuttikittheliwa murette, ni aataleleiyee... ahiiso oputaputeliwe ikuwo, ni khwaataleliwa mmahiye. Elapo ele, yooviha ni yoonaana, sinthuneya iwoora vakhani paahi wira Owo apacerye wuntta. Nyuwo mwapacerya wunt-... wuntelana, moosuwela, erutthu awe, ephula awe, enoomora ni itthu, wuntta onokela; elapo ele, yooviha ni yoonaana. Yaamwiira yinttale, okhala wira yaari erutthu. Masi Owo aahisuwela, erukuruku ile ehinatthi wuntta, wira Muluku aahihimya mwa Davidi profeta wira, "Miyo nkinimuhiya Oowaarya Aka wuntta."

425 Moota Owo aakunxaawe Masu a Muluku ni aakhala ni Yaawo! Vano, khula mmosa w'anatiri ale mme yaamwaasa Yoowo, Muluku aahaamaliherya khula mmosa a yaawo. Ni khula natiri onimwaasa mulipa-oowaamini, Muluku onoommaliherya khula natiri a Yeeyo. Amen. Mmumule ni nrromelo wira Eyo Ekeekhahi. Amen. Tivo, munepa Awe. . .

Munuupuwela wira ti . . . Nnari, muswammaha. Erooho ya Yesu yaari vayi moovirani mwa mahiku mararu erutthu Awe yaaryaaya mmahiye?

426 Erooho Awe yaari omooroni, mapuro a vathi; vano Owo khuhihimuwa. Nto khino kinimwaacererya nikhaani—nuulumo naamukhaani va nikhanle wookhaliheryani vanci-ene. Okathi Owo ohihimunwaawe, Yawawe. . . Okathi Owo ohihimunwaawe mw'alipa-ookhwa, Owo nlelo khaamalinhe mara muteko wo ovuluxa. Ti yeeyo. Owo aahaana okukuttha etthu yothene. Ehisapo yaahilinwva, masi woova iwo wa omooroni, woova iwo wa omahiye. . . Nto va, okathi Owo—okathi Owo okhwiyaawe, Owo aahikelela ohoolo. Owo khonahiyeke ovara muteko okathi Owo okhwiyaawe, Owo aahitthikela alaleyaka! . . .? . . . Kileveleliwe eyirelo aka yoohisuumaaliha, woona waka, masi Owo khaamalinhe!

427 Nyuwo khamunkhalakhala mukhwaaka! Erutthu anyu pooti omumula okathi vakhani, masi Muluku onooihimuxa, Owo aahihimya wira aamwiira. Masi nyuwo khamunkhalakhala-tho mpweteyaka siiso Muluku ohikhanlyaawe opweteyaka. Ti yeeyo. Nkawahani, Yawawe. . . Owo vamanlyaawe okhwa, wa etthu. . . aakhwiye wa awiixutti. Owo aaroorupa, yeeyo Owo aaryaawe. Awo yaamuhenle Owo moorupani; ntoko Owo saahimyaawe sa Laasaro, "Miyi kinoorowa kanvenxe." Muluku aahaana onvenxa Owo.

428 Nkawahani, Owo aahirowa vathi naanaanoru, Owo aahitthikela olaleerya. Ni Owo aalalenrye minepa nno mukhatteya. Khurowa mpakha omooroni, khukuxa ihulelo wa xetwani. Khuwela-tho khulaleerya oParatiiso, nto khuhihimuwa mmurotonni mwaya. Khwaathotola arummwa Awe mahiku miloko mixexe, nto wookiseryani wa nihiku nanamiloko mixexe, Owo khuwela; okhala wira, itthu sothene saari vasulu va hiyo, wiiwelela s'okhwiri ni itthu sothene sikina. . . Owo oothikila khula wiiwelela s'okhwiri, khula ohoverya, ni khupaka eliinya ya mavekelo okhuma elapo ya vathi mpakha Movuwani mowelani mwAwe. Khuwela khukilaathi moonoo woolopwana wa Omwene Awe. Muxintta! Muxintta Muulupale, mara. Okhwa khuwaawerya onvarelela! Omooroni khuwaawerya onvarelela! Elapo ya vathi khiyaawerya onvarelela!

429 Okathi Owo aary'awe muumu elapo ya vathi, Owo aavahiwe e. . . Owo aaronwe muttethe wa vathixa ni w'atthu a vathixa, ni aavahiwe nsina na vathixa. Ti yeeyo mutthu aamwiirihaly'awe

Owo. Owo aahirowa oYeriko, muttethe wa vathixa. Mutthu ooyevaxa aahaana owela mmwirini wira anwehe Owo vathi. Ti vaavo mutthu aamuhenle-awe Owo. Owo aari karumeya aarapinhe inawu, muteko wootepaxa onanara aakhanlyaawe ovahiwaka. Owo aahikhala a vathixa. Ni Owo aaihaniwe nsina nootepaxa ohifayi aakhanlyaawe ovahiwaka, *Pelizepuli*, “mukhulupale a axetwani.” Mutthu aanvanhe nsina na vathixa, nipuro na vathixa, ni khimuroiha Owo mapuro a vathixa a omooroni wa vathixa.

⁴³⁰ Muluku khunvenxa khimuroiha Wirimu Woottukhuwaxa, ni Nsina vasulu va khula nsina. Aleluya! Vano, Owo hata ohaana oweha vathi wira oone Erimu. Ehice Anyu ehinnuwihwa vasulu va erimu ya Wirimu. Ni Nsina nuulupalexa nitonko oromoliwa Wirimu ni elapo ya vathi nihaana okhala... nikelihiwe mwa Yoowo. Ti yeeyo Muluku omwiirinhe-awe Owo. Mutthu aamuhenle vathixa, nto Muluku khimuhela Owo Osuluxa. Owo aari vale, okhuma vathixa mpakha, Osuluxa.

⁴³¹ Owo aahikhala a vathixa wira aniruhe hiyo mpakha Osuluxa. Owo ohiikhaliha hiyo, wira hiyo mwaha wa mahala Awe nikhale Owo, aana a Muluku. Ti weiwo Owo aaronwaawe. Amen! Nittotopeliwe Nsina Nawe. Owo oopaka ephiro wira hiyo niwerye orwa, nave, nihiku nlo, “Okhala wira Miyo ka mukumi, nave-tho nyuwo munookhala akumi.”

⁴³² Oh, khivanxankiha... Okathi mutthu onivaraawe yoowoona eyo, khonakhaleke hata mutthu aawerya otaphulela. Awo hata aheererya otaphulela, waapweteyaka muupuwelo aya; nsipo nla nuulupale: “Oh, ophenta wa Muluku, wowaatta ni wooloka! Woohithokoseya ni wa ikuru!” Eversu iyo yookiserya... ahiiso kookupali eversu yoopacerya, enihimya so: “Nasariha ephareya yothene ni etinta, Ni erimu yaari epaphelo;...” Nyuwo moosuwela vaphwanyiswaaya nenlo? Nilempwe w’anepa... empa y’anaanepa. Khaavo onwerya okhalakhala ataphulelaka Ophenta iwo wa Muluku. Oh, khivanweryaneya ohimmwa, etthu Owo oniirenyaawe. Wulu, mwaarowa owerya sayi ohela-vo ephwanelelo vo? Awo mahala Awe, okhuma wopaceryani mpakha wookiseryani. Kaahirimeela, oohononeya, ni oohirromela, hata yooreera, hat’etthu ya yeeyo, nto Owo ni mahala Awe khurwa khunoopola. Oh, wulu. Eyo ti Yawawe... Owo ti Pwiya aka. Iwo ti ophenta Wawe, iwo ti oreera Wawe murima.

⁴³³ Vano nirina minuutu soophiyaka mithanu na miili ni sookoha soophiyaka muloko ni thanu ni...

62. Munuupuwela wira ti yoolikana athiyana ovara muteko w’omeekha ota wa ekereja?

⁴³⁴ Ayo. Eyo ti yookoha paahi, paahi e...kahi yookoha ya yoolempwa, masi... Veekhai, ti siiso. Ayo, mulopwana, hiyo othene n’anamavara muteko vamosa. Athiyana aakhalana

mapuro aya, ni vekeekhai awo pooti ovara. Ayo, mulopwana. Nvareke muteko wothene w'omeekha munweryaanyu ovara, nto Muluku onimooreerihani mwaha wa yeeyo.

Vaareera, vano nrowe noone:

63. Xontte muleliherye oraaru. Onwerya sayi Mwaana okilaathi moonoo woolopwana w'Atithi, aalapelaka wa... Atithi, vakhala wira awo kahi athu aili?

⁴³⁵ Ahe, mpatthani oophentiwa, eyo e...owo—owo muupululo. Vakhala wira Yesu ohimnye wira, “Miyo n'Atithi Aka nri Mmosaru,” vano vanweryaneya sayi okhala aili? Munnona? Vano, awo kahiyo aili.

⁴³⁶ Muthiyana mmosa emaara emosa aahikiirela, nto miyo kaaleliherya yeeyo, khwira, “Nyuwo ni amwaar'inyu muri—muri aili, nave mwa mmosaru.”

⁴³⁷ Miyo khwira, “Masi, Muluku ni Mwaana ti voovirikana ni yeeyo, moone.” Miyo khwira, “Munnikoona miyo?”

“Ayo.”

“Munniwoona amwaar'aka?”

“Nnari.”

⁴³⁸ Miyo khwira, “Vano, Tithi ni Mwaana ti voovirikana; Yesu ohimnye wira, ‘Mwaakoonaka Miyo, muniwoona Atithi.’” Munnona?

⁴³⁹ Atithi ni Mwaana... Atithi yaari Yehova Oowerya sothene (Muluku) akhalaka empa eniihaniwa Yesu Kristu, yoowo aari Mwaana ootikittheliwa a Muluku. Yesu aari Mutthu, Muluku Eroohoo. Ni khaavo otonko omoona Muluku hata okathi mmosa, masi ole mmose-ene a Atithi tomusuwelinhe Yoowo. Owo aari... Owo... Omutthu Awe, mukhalelo Awe, oMuluku Awe, etthu p'itthu Owo aaryaawe, Owo aari Muluku! Owo khaari hat'etthu yoovukuwa wala hat'etthu yoovikana woohikhala Muluku. Nnakhala vo, Owo aari Mutthu. Owo aari Mutthu, empa Muluku aakhalaawe-mo. Ti yeeyo, Owo aari nipuro n'okhala na Muluku.

⁴⁴⁰ Vano, nyuwo mwatthuna vale Soolempwa kamosa-kamosa ya yeeyo: Munna Neville, mukiphwanyerye Marku Oowaarya 14:62. Nto Munna Wood muthiyana, mukiphwanyerye aEfeso 1:20. Okhala-tho orina Bibilia? Ahe, avenxe ntata. Munna Arnold muthiyana, mookhalana mmosa ottuli iwo? Vaareera, mukiphwanyerye Miteko 7:55. Vaareera. Marku 14:62, Munna Neville; ni Munna Wood muthiyana ti aEfeso 1:20; Miteko 7:55, Munna Arnold.

⁴⁴¹ Vaareera, mookhalana, Munna Neville? Vaareera, musome vano. [Munna Neville onsoma Yoolempwa—Mol.]

[Nto Yesu khwira, ti Miyo: ni munoomoona Mwaana a mutthu akilaanthe moonoo woolopwana wa owerya, ni arwaaka mmeekuni a wirimu.]

442 Vaareera, vano, nwehe nuulumo nopacerya vo, Yesu iirale, “MIYO KOOKHALA.”

443 “MIYO KOOKHALA.” T’ani aari MIYO KOOKHALA? Khonakhaleke mutthu mulaponi mothene aawerya otaphulela Yeeyo. Hata e...nyuwo munsoma otaphuleliwa moolumo a ekereku ni sikina, khonakhaleke hata mutthu aawerya otaphulela...Ti J-v-h-u. Ni hata asomi aHeperi khanaweryeke oromola Eyo. Vamiiwani vale waavarela, nihiku nle okathi Owo okumann’awe ni Moise, Owo aari J-v-h-u. Tivo awo yaarononle “J-o-h, Yehova,” masi kahi “Yehova.” J-v-h-u, moone, khaavo onsuwela.

444 Nto nyuwo muniira, “Ahe, Moise khaawerya otaphulela Eyo.”

445 Owo iirale, “Kihimyeke wira t’Ani?”

446 Owo khwira, “Mwiire, ‘MIYO KOOKHALA’ ohoorumani. MIYO KOOKHALA.”

447 Vano nwehe, *MIYO KOOKHALA* okathi wa naanaano, kahi “Miyo kaari” wala “Miyo kinookhala,” MIYO KOOKHALA. Vano, Owo ohimye wira, “Ela enrowa okhala eyuupuxeryelo ya maloko othene: MIYO KOOKHALA.”

448 Vano nkanweheni Yesu oryeene va vaniirani nihiku nle. Awo yiirale, “Hiyo noosuwela vano wira nyuwo mwa mulolo.” Moolumo oolikana, “Nyuwo moovahuwa.” (*Oovahuwa* ti “mulolo.”) “Hiyo noosuwela wira mwa mulolo. Nyuwo mwa muSamariya, murina xetwani.” (Yohani Oowaarya, kapiitulu 6) Nto owo khwira, “Vano, nyuwo munihimya wira mwa... moomoona Abrahamu, ni nyuwo mwa mutthu muhivikanne miyaakha miloko mithanu?” (Khino siiso owo oonale onvikana vakhani munnuwelo Awe, masi Owo aarina miyaakha miloko miraru paahi, masi muteko Awe.) Khwira, “Munihimya wira nyuwo mwa mutthu muhivikanne miyaakha miloko mithanu, nto muniira ‘moomoona Abrahamu’? Hiyo noosuwela wira nyuwo mwa mulolo vano.” Munnona?

Owo khwira, “Abrahamu ahinatthi okhala, MIYO KOOKHALA.”

449 “MIYO KOOKHALA,” Owo aari MIYO KOOKHALA muulupale. Va Owo onaaleela-tho aYuta ala, moone, “MIYO KOOKHALA! Ni mwakoonaru Miyo kirwaaka moonoo woolopwana wa owerya...” Eyo ekeekhai?

450 Musome-tho yeeyo, munna. [Munna Neville onsoma Yoolempwa—Mol.]

[...ni munoomoona Mwaana a mutthu akilaanthe moonoo woolopwana wa owerya, ni arwaaka mmeekuni a wirimu.]

451 Musome yawinyu vano, Munna Wood. [Nipuro vahiitthu mufiitani. Munna Wood muthiyana oniira, “aEfeso 1:20?”—Mol.] Ayo, muhano. [Munna Wood muthiyana onsoma Yoolempwa.]

[*Soonihenryaawe mwa Kristu, okathi omuhihimunxaawe mookhwaani, omukhalaha moonoo awe woolopwana mapuro a wirimu.*]

452 Vaareera, musome yawinyu, munna. Moone, Eyo emosaru. [Munna Arnold muthiyana onsoma Miteko 7:55—Mol.]

[*Masi owo, asareiyee Erooho Yoowaarya, aahiweha wirimu, khoona ovuwa wa Muluku, ni Yesu aryeene moonoo woolopwana wa Muluku,*]

453 Vano, moone, Ye- . . . Muluku khaakhanle okhalanaka ntata noolopwana nuulupale, moone, vano Yesu eemenleene *mwa* moonoo Awe woolopwana. *Moonoo woolopwana* enihimya “okhulupale.” Munnona? Mwa nlikanyiho paahi, ankhii—vaakhanle wira miyo kaari mulipa-oweettiherya ekereja voomalela, wala miyo kaari pixipu a enamuna khata, nto Munna Neville aakunxe opuro aka, owo aamukhala moonoo aka woolopwana. Moone, eyo enihimya wira owo . . . owo aarowa okhala moonoo aka woolopwana.

454 Vano, Yesu ori moonoo woolopwana wa Owerya. Vano, Owo onihimya siiso, va mwa aEfeso, okathi owo onleeliheryaawe, Owo ori moonoo woolopwana wa Owerya. “Koovahiwa owerya wothene Wirimu ni vathi” (Owo oohimya, nuumala ohihimuwa Wawe) “koovahiwa mmatatani mwAka. Miyo kookhalana owerya wothene Wirimu ni vathi. Vano murowe mwawiixuttiheke atthu a maloko othene, mwaapatisaka ni Nsina n’Atithi, ni Mwaana, Erooho Yoowaarya, mwawiixuttiheke weettela ithu sothene miyo koorumme-akani; nto, Miyo kinookhala ni nyuwo mahiku othene, mpakha omala olumwenku.”

455 “Owerya wothene Wirimu ni vathi.” Eyo eri vayi . . . Aakhanle-ene muluku osulu iwe omuhiya Yoowo, owo t’ohikhalana owerya. Moone, khivaaweryaneyya okhala Muluku mukina. “Koovahiwa owerya wothene Wirimu ni vathi” ori mmatatani mw’Awe. Vano, moone, “Owo ori moonoo woolopwana,” (ntoko mutthu okohalyaawe yookoha), khenihimya wira . . .

456 Vano nkawehani, erutthu . . . Muluku Eroohoo. Ayo, akavi aniiwa saana yeeyo? Mwiire, “Amen.” Muluku Eroohoo, Yesu ti Mutthu, nto Yesu aari Muluku owiipaka erutthu. Yesu aari . . . Hiyo khinaakhalakhala niweryaka omoona Muluku, moone, Owo Erooho. Khamunwerya woona erooho. “Khaavo otonko omoona Muluku hata okathi mmosa.” Khaavo hata mutthu aarowa owerya omoona Muluku.

⁴⁵⁷ Ni mukihye kihimye ela, “Khimunatoko okoona.” Nyuwo khamunatoko okoona mookhalaru, ni khimunkhalakhala mukoonaka. Eyo ekeekhahi. Nyuwo munoona erutthu ila enimusuweliha mutthu ula, ori muhina mu. Vano, erutthu ila kherina Ekumi Ehinimala, masi erooho yookhalana Ekumi Ehinimala. Erutthu ila enoohokolowa, masi enookhuma-tho yoolikana, siiso ntoko enuku y’etrikü enrowaaya mutthayani. oKristu onlipiheriwa mwa ohihimuwa, kahi orantteliha. Ohihimuwa; Yesu yoowo mmosaru aaronwe vathi, Yesu mmosaru yoowo ohihimunwe. Nyuwo mwarowa mmahiye ooxeerya maihi, munihihimuwa ooxeerya maihi; mwarowa mmahiye ooriipa maihi, munihihimuwa ooriipa maihi. Moore, iwo ohihimuwa.

⁴⁵⁸ Mwaarowaka olya. . . Miyo kaahimukoha meetiku yeeyo, woohikhala khalayi, Miyo khwira, “Mwaha wa xeeni okathi waary’aka iyaakha muloko ni thanu na mosa. . . Khula okathi kalyaaka, kaanirehererya ekumi aka?”

⁴⁵⁹ Khwira, “Ti yeeyo.”

⁴⁶⁰ Mwaapaka isya—irukuruku isya khula okathi mwaapaka. . . e—erutthu empaka. . . ahiiso yolya empaka irukuruku isya, nto erukuruku ile y’ephome enookhalihani a ikuru. Ti siiso munkhalaanyu. Vano, etthu ehaana okhwa khula okathi, wira nyuwo mukhale mukumi. Khula nihiku, etthu ennookhwa: mwaakhuuraka enama, enyompe erimookhwa; wala etthu p’itthu enlyaanyu; ni ehopa erookhwa; wala e—wala etriku erookhwa, wira epake mukatthe; kharakha orookhwa, wira epakiwe yoolya ya kharaka; ni. . . khula muthinto wa ekumi; nyuwo munwerya paahi okhala mwaha wa etthu ekhwiye.

⁴⁶¹ Nto nyuwo munwerya paahi okhala Voohimala okhala wira etthu emosa ehookhwa: Yesu. Kahi mwaha wo wira muhiitakaniha ekereja, kahi mwaha wo wira moopatisiwa, kahi mwaha wo wira moohimya oKristu; okhala wira mookupali Ekumi ya Yesu Kristu yeeyo evuuvale ephome. . . Ephome emwaraxiwe mwaha wa nyuwo, vano nyuwo mukupali Owo okhala Moopoli anyu.

⁴⁶² Vano, nwehe, miyo kinvekela ela. Kintthuna kookoheni *nyuwo* ela. Nkawehani ila, ti yooreera. Khino miyo kihixuttihä eyo khalayi (nkisuwenle) vaava; mulaleyaka mapuro othene, munooliyala etthu muhimmyaanyu emosa. . . mapuro kamosa-kamosa. Masi, ekhalenleni, nto. . .

⁴⁶³ Vano, kinoona wira, Munna Smith muthiyana. . . Nkisuwenle khama kaanimusuwela Munna Fleeman okathi ene yoowo wala nnari. Ni Tryphena, kinnimuupuwela okathi waaryaawe mwaana mwaamuthiyana. Nyuwo munnikuupuwela, okathi waakhalakaaka. . . kaaryaaka mwammiravo, ookhüveya, a mwiitti; maihi, ooriipa ni oonyokotowa. Kaaniwanaka ekhotto ya box. Oh, koona wira kaari mulopwana ooreerela molumwenkuni. “Oh,”

miyo kaanuupuwelaka, “khaavo onwerya okixintta. Nnari, mulopwana.” Masi miyo—miyo kaahiiwoka mwa yeeyo, moone. Masi miyo... Vano, miyo kaanuupuwelaka, “Oh, wulu.” Kaanuupuwelaka, “Kaaoweheriwe etthu ila ottuli waka, miyo kaamweetta mphironi ni yeeyo.” Tthiri, khiivo enikihaaxa. Ni khula okathi kaalyaaka, kaakhala muulupalexaxa ni a ikuru saana okathi wothene. Khula okathi kaahela ekumi esya... Miyo kaamulya rapoyo, patata, ni afixawu, ni enama, siiso ntoko sinlyaaka olelo. Ni kaakhala oowaatta ikuru ni muulupalexaxa okathi wothene. Nto vaphin’ye-aka ntoku miloko miili ni mithanu... .

⁴⁶⁴ Miyo kinnilya oratteene vano ovikana saalyaaka okathi ule, nyuwo othene munnikisuwela, munnisuwela eyo. Miyo kinniweyera olya oratteene vano, hiyo othene. Masi mwaha wa xeeni, Munna Eagen, nto, vakhala wira nlelo kinlya yolya yooreeraxa, yoowaatta, ivitamiina soolokaxa ni sothene... Nto vanlyaaxaaka, kinoovukuwa vakhani-vakhani. Nto vano kinkhala mutthu oomora makhata, a ntari, ni kinikhala oowuuluvala, ni matata anrweela manyyari, wiitho woonyaala, makhata anoomora, voosiisu ti voorika ovenya, ni... Oh, wulu. Exeeni iyo? Vakhala wira kinnirehererya ekumi khula okathi onlyaaka, mwaha wa xeeni yeeyo nto?

⁴⁶⁵ Kaakumihaka maasi muxaaruni kihelaka mukoophoni, ni ephiyaka nuusu, vano nto empacerya ovukuwa ohiya osarya; nto vantepaaka ohela-mo, anoovukuwa voowaakuvaxa. Eyo eri vo. Ni khimwaarowa owerya wooniherya eyo ni siyensiya vaakhanle wira mwaahaana wira. Eliivuru ila t’itthu emosa paahi wira yooniherye wira Muluku oolamulela; okumana, Muluku oonoona nirwaaka.

⁴⁶⁶ Nyuwo alopwana atokweene, ni nyuwo athiyana atokweene, khino amosa-amosa a—axiyya anyu n’axaar’inyu khino aarowa, eyo kheni—eyo khenihaaxa hat’etthu. Aleluya! Awo ari epantte ekina y’ekuwo iwe, anoowehererya, vekeekhai, vano awo anoowehererya okhala ni nyuwo emaara ekina. Eyo ekeekhaii, tthiri, awo anoowehererya. Awo anoowehererya okhala-tho vamosa. Bibilia ohimnye wira awo, minepa siri vathi v’altaari sikhuwelaka, “Pwiya, mpakha liini?” Munnona? Awo khakhanle ni mukhalelo aya wooloka.

⁴⁶⁷ Muluku khonipanke hiyo Malaikha, owo onipanke alopwana n’athiyana. Hiyo okathi wothene ninookhala alopwana n’athiyana, okhala wira hiyo na mu—muhokorokho wa osuwela wa Muluku mwaneene. Hiyo kweekwe ninrowa okhala alopwana n’athiyana.

⁴⁶⁸ Masi exeeni eniiriha? Moone, khino nyuwo munuupuwela wira okathi waaronwaanyu waltaari, nyuwo ni aiy’anyu, khwira ninookuxana mwa ophitaana ntoko malamulo ni okhala vamosa wa mukhalelo woowaarya w’othelana nno,

ni mahala a Muluku ni siiso, ni onamoona anyu wothene mwaahimnye-anyu, ni elaphelo mwaairalyaanyu. Naanaanoru, khupacerya oweha, oowaili anyu. Awo yaari oowookowa, ni maihi yaanaarya; ni amaama ni maitho aya ooreera, a ncano, wala maitho ooripelela, wala etthu ntoko yaaryaaya. Oh, moota nyuwo mwaawehakaanyu. Nyuwo mukhumaka, mwaamwaaweha apaapa, “Vano, makhata ale oowookowa”; nto nuuvira okathi vakhani khupacerya omora. Amaama khupacerya ottweelela maihi, wiipa makhonyokhonyo khukela ni sikina. Nto nuuvira okathi vakhani, awo aarowa, wala aiy’anyu aarowa.

469 Yaari exeeni iyo? Okathi Muluku oowenhaaweni mweemenle vale, Owo iirale, “Ti yeeyo, eyo t’inamuna Miyo kinootthunaakani. Vaareera. Okhwa, rwaakani, masi muhaakuxe mpakha Miyo kootthuniheryeni.”

470 Oh, oh, kinimuupuwela Yobi. Ayo, Muluku aaweha vathi, Yobi aanisuwela wira Muluku aanimphenta. (Nto nwehe owo khokhanle wookuxakani.) Owo iirale, “Nyuwo mookhalana owo mmatatani mwanyu, masi muhikuxe ekumi awe.”

471 Vano nto naanaanoru, makhata khupacerya omora, nto nuuvira okathi vakhani moorowa. Yaari exeeni yiiraneieye?

472 Vano, woohihimuwani khenrowa okhala etthu enthoonyerya okhwa. Khivanweryaneya okhala etthu emosa enthoonyerya elapo ela, ya etthu. . .Moone, nyuwo mwaakhala n’utthuna wa Muluku, mwaahikhalana ekumi. Vano okhwa khukela, khookuxani. Mulyaaka yolya emosaru ni itthu sothene, nwuryaka enamuna emosaru ya maasi, itthu sothene; masi okhwa khukela. Masi elatarato ene yaahikhalihwiwa. Aleluya! Woohihimuwani munrowa okhala-tho ekumi. Nto khunrowa okhala okhwa, wala yoolikana ni okhwa, wala wuuluvala, wala orakala wala etthu p’itthu. Oohikhwa, ninrowa okhala oolikana ni Yoowo, ooloka voomalela mahiku othene. Aleluya. Oh, miyo. . .Eyo yaammwiiriha mutthu okhuwela, vanci-enexa mwaphiya munnuwelo aka.

473 Munnuwelo aka, woona waka, okathi nyuwo, nkuupuwelani yeeyo, ovikana muhinatoko anyu. Nyuwo muri mwa mukhalelo owo wo orukunuwa, moone. E. . .Munooacerya otikinihiwa, “Sothene iya sinihimya-ni? Kiirale exeeni?” Miyo kinooweha ottuli nno, kinnuupuwela, “Wulu, Muluku aka! Ahe, eronwe vayi, Pwiya? Miyo kiri va, miyaakha miloko mixexe ni mithanu na miraru, miyaakha miili tho, kinookhala nuusu na emiya. Wish! Miyo paahi ka. . .Nkawehani paahi minepa kamosa-kamosa miyo kiphwanye-aka; kintthuna kiphwanye imilyawu ni imilyawu sikina.” Muluku, akikhaliherye.

474 Kinnuuliwa muru mmansaka ophiya owaani kikhumaka wowiithyuuwani. Muupuwele, “Oh, yoohepha yoottokottha, nave anamuteko ari vakhani. Athu imilyawu sene mutampini

ni ehaaya animookhwa khula nihiku, nwiriyane wiihana waya.” Miyo kinoorowa voolilini vale ohiyu ni owiwa apakawu awo oohaawa ekhuwelaka iwe ilapo s’ottaiwene. Moota anrwaaya ikonto sene, ekirweelaka, ni—ni keemenle-ene iwe ammorela matteeke weiwo jaarinaaya waahela mamiliisiya wira aweettiheryeke, wira emwiwe paahi wahala a Yesu Kristu.

⁴⁷⁵ Nto nno hiyo nihaana waavara metto, ni olaleerya mpapheloni ni itthu sothene sikina, ni ophwanya mapuro ooreeraxa wira awo ekilaathi, ethweelelo yooreera ni wiipa wooreera, awo animoorwa ni wira, “*Ahhh!* Ahe, kinoona wira eyo yaari saana, kheniira mpantta wo waamini waka hata vakhani.”

⁴⁷⁶ Oh, wulu, okathi—okathi—okathi xeeni ekhanlyaaya olekelaka? Kehiyo...kehiyo yooloka. Ni hiyo nno ninthukumanya itonelaata ipilyawu imiya sene sa soolya mulaathani mwa ikokhola, nave atthu ale yaamwaakhela etthapaka. Ni awo ti soopattuxiwa sa mulaponi ntoko hiyo sikhanyaahu. Wulu, hiyo...Ahe, eyo khekhanle wiiraka siiso okathi munci-ene.

⁴⁷⁷ Vaareera, vano, T’ani okhanle Tithi? Atithi ni Mwaana ari Mmosaru. Nwehe, mwa Yohani Oopacerya 5:7, Eyo ehimmye wira, “Ari araru ankholela onamoona Wirimu, Atithi, Masu (yaawo okhanle Mwaana)...Tithi, Mwaana, ni Erooho Yoowaarya: ala araru ti Mmosaru.”

⁴⁷⁸ “Aakhala araru ankholela onamoona vathi, akhanle maasi, ephome, ni Erooho.” Iyo t’itthu tthaaru saakhumme mw’erutthuni mwa Kristu. Awo yaaroomuhoma mpararini mw’Awe: maasi khukhuma, Ephome khukhuma, “Mmatatani mw’Anyu Miyo kinnivahererya Erooho Aka.” Eyo eri vo, iyo t’itthu tthaaru. Tthaaru iya khasihiyo emosaru, masi iyo *siniivanana* vamosaru.

⁴⁷⁹ Tithi, Mwaana, ni Erooho Yoowaarya; Yohani Oopacerya 5:7, onihimya wira, “Ala araru ari Mmosaru.”

⁴⁸⁰ “Maasi, ephome, ni Erooho *siniivanana* vamosaru.” Kahi Mmosaru, masi *siniivanana* vamosaru. Tivo Atithi...Nto etthu emosa paahi erutthu yaakhanly’aya wiiraka, okathi Muluku onwery’awe wiisoono Mmansawe, wira mwa ehukhumu ila erutthu evinryaaya-mo, wookhala wiikimanya...weemexa vaavo vo, moone. Owo p’ukathi Owo onoonawe Ephome eyo enikhala eriyari ya Yoowo ni ehukhumu. Va ari Masu Awe, yiirale, “Nihiku ninrowaanyu olya, nihiku nenlo munookhwa.” Nto va Yesu khwira, “Miyo...Masi Miyo kinookhala nipuro naya. Moone, Miyo kookhala nipuro naya.”

⁴⁸¹ Munnuupuwela yookhumelela aka ohiyu ule vaavo koonalyaaka yoowoona ya muthiyana ni mukhalelo wootakhala saana aari okatthi iwe? Nto miyo kaammuulumela, kiiraka, “Muluku, muhininyaanyela-ni nipuro nla?” Vano Owo

khukooniha *miyo*, moone. Vano miyo khurowa mpakha wa yoowo khimuhimeerya yaakhumelenle.

Vano, ela ti yookoha aka yookiserya.

64. Munuupuwela wira, voolikana ni Soolempwa, wira aYuta anookhala... anoorowa omukupali Kristu ohinatthi Okuxiwa wa Ekereja?

⁴⁸² Miyo—miyo—miyo vekeekhai kinnaamini wira Okuxiwa wa Ekereja... Ola muupuwela aka yoomi, moone. Ni naakhalanne okathi, naamoono eyo voomalela, masi so—soovikana iwoora thanu na xexe vano. Nkawehani, miyo kinnaamini wira aYuta anoorowa omwaakhela Kristu wa Orwa Wawe wa nenli. Vano muupuwela, wira mutthu uwo osuwele ela, maitho ahu yaahikhalihwa oohoono, ahiiso, maitho aya yaahikhalihwa oohoono wira hiyo naakhele woona wahu. Khula mutthu onnisuwela, Soolempwa sinnihimya yeeyo. Eyo ekeekhai? Paulo onnihimeerya wira yawihu...wira hiyo nookhalihwa oohoono...wira aYuta yaahikhalihwa oohoono wira hiyo niwerye omwaakhela Kristu. Munnona? Nto hiyo na mwiri wa olivera wa mutakhwani ottopanyeriwe vamwirini mwaha w'okhalihwa mwaana.

⁴⁸³ Vano va t'uri muupuwelo aka, kinrowa woovahani paahi... Kirookohiwa, “Munuupuwela wira...?” Vano va t'inamuna enuupuwelaaka wira enimwiiraneya. Miyo nkisuwenele. Enakhaleru etthu p'itthu, miyo kookupali wira ni mahala a Muluku ni omoriwa Wawe ikharari, hiyo ninoorowa okhala weiwe; moone, ni mahala Awe, enakhaleru etthu p'itthu. Miyo pooti ohiweryaka olakiherya saana, masi va t'ile miyo enuupuwelaaka. Miyo kinnaamini wira niri okathi wa wookiseryani. Kookupali wira okathi wa Amalapo onoomala vano. Kookupali wira niri woomalelani.

⁴⁸⁴ Nto vano aYuta; va sinnikhalaka itthu piili kweekwe enaakhalihaka voohiloka aYuta: Awo yaari oohoono, awo khiyaawerya woona; ni okhala wira Amalapo, mwaha wa etthu emosa, imaara sinci-ene... .

⁴⁸⁵ Miyo kaalavula ni muYuta mmosa oBenton Harbor, Munna Smith, nto moosuwela etthu owo aakihimenryaawe? Iwe nimosa wa Isarayeli ale...mapuro a Isarayeli iwe. Yookoha ela ya ovonihiwa wa mulopwana mmosa ahoona. Nto owo khwira, “Khimukhanle waathikila aYuta...Khimukhanle omuthikila Muluku ipantte ttharu khunvaha Yoowo muYuta; omukhalihwa Owo Tithi, Mwaana, ni Erooho Yoowaarya.” Khwira, “Khimukhanle omwiirelaka yeeyo muYuta, hiyo khanihiyo anamaakokhorela amuluku a ithiru.” Khwira, “Hiyo ninnimwaamini Muluku *mmosa*.” Munnona?

⁴⁸⁶ Nto nyuwo munoorowa omukhalihwa aMuluku araru: Muluku Tithi, Muluku Mwaana, ni Muluku Erooho Yoowaarya; nyuwo vekeekhai munoomukhalihwa muYuta ohoona vaavo vo, okhala

wira owo onnisuwela oratta-ene. Owo onnisuwela oratta-ene ovikana eyo. Eyo yaamurowa wookhalihani namuluku a ithiru siiso ntoko okokhorela w'ethiru, nyuwo murina amuluku araru. Muhaana waakhaliha awo Muluku mmosaru, kahi amuluku araru, ti miteko miraru sa Muluku mmosaru. Moone, Muluku aahirumeela mwa Otiithi, Owo aahirumeela mwa oMwaana, ni Owo onnirumeela vano okathi wa Erooho Yoowaarya. Ti Muluku mmosaru yoowo.

⁴⁸⁷ Mwaha wa yeeyo onirummwaahu opatisa mwa Nsina n'Atithi, Mwaana, Erooho Yoowaarya; okhala wira, kahi mwa nsina na. . . Mwa *Nsina*, kahi masina; kahi mwa masina, wala mwa nsina n'Atithi, mwa nsina na Mwaana, mwa nsina na Erooho Yoowaarya; masi “mwa Nsina n'Atithi, Mwaana, ni Erooho Yoowaarya.” Moone, nimusuwelaka Muluku mmosaru okhala Kristu. Moone, owo ti Yoowo okhanle, khivanweryaneya okhala enamuna ekina. Munnona? Ni Yoolempwa. . .

⁴⁸⁸ Vano—vano nto vakhala wira muupululo ahu ti woovonyeya, weeso Petru ni arummwa akina yiixuttiha etthu yoovonyeya; okhala wira khula mutthu mBibiliani aapatisiwe mwa Nsina na Pwiya Yesu Kristu. Khaavo hata mutthu otonko opatisiwa mwa “Tithi, Mwaana, Erooho Yoowaarya,” owo mwiixuttiho w'Ekatolika. Kinoowerya owooniheryani ni moolumo aya yaawo, ni atisiyonaariyu aya ni sothene. Eyo eyaaminelo y'eKatolika ni kuhiyo mu—ni kahi mwiixuttiho wa Bibilia. Ni khaavo mutthu. . .

⁴⁸⁹ Hata Mwene a Inklateera aapatisiwe mwa Nsina na Yesu Kristu. Miyaakha soophiyaka imiya thanu na mosa nuumala okhwa wa murummwa ookiserya, okathi wiiraaya ohiihaniwaka Inklateera, wihaniwa “Muttethe wa Malaikha.” Ti vaavo nikhummyaaya-vo, nsina. Owo aapatisiwe mwa Nsina na Yesu Kristu.

⁴⁹⁰ Etthu yaamurukunxale murima, yaari ephera yaamukhaani. Okathi. . . Kawerya vale wuupuwela, kahi Saint Angelo. Nsina nawe aari pani, vano? Hakapu, Hakapu Oowaarya, kookupali wira aari yoowo, nkikupalanxe nsina nlo, vano. Masi, khula enamuna, owo aahirowa iwe, vano khwaakuxa amosa-amosa wa ala. . .

⁴⁹¹ Awo yaawitthana malaikha okhala wira, atthu ni Asiriya ni siiso yaari a nikhuli nooriipa, nto Ankelesi ala yaarina maihi oorakama, ootteela, oonyokotowa, yaari a ncano, Anklo-Sakisoni, nyuwo moosuwela, a maitho ooripelela. Nto awo khwira, “Awo yaakhala ntoko Malaikha,” nto siiso awo kwiihana “Muttethe wa Malaikha.”

⁴⁹² Nto mu—murumeyi a Apwiya khurowa weiwo nto aamulaleerya mwene aya, vano awo yaakilaanthe erukurenrye vaikho, vaalupale vootaphuwa. Miyo kaamusoma wahala ene a yeeyo woohikhala khalayi. Vano mwaapalame mmosa

mwaamukhaani khuvavela vowaaryani khutthika, vano mwene khukoha etthu, “Owo okhumme vayi ni oronwe vayi?” Munnona? “Owo aaruule vowaaryani, ni hiyo noomoon, vano owo khutthikela mw’epiphini. Eyo kahi ti enamuna mwa ekumi ya mutthu?” owo khuhimya.

493 “Masi owo aari exeeni owo ohinatthi orwa mu?” khukoha mulaleyi, moone. Eyo yaahinvara mwene; nto voosiisu aya, owo ni etthoko awe khupatisiwa mwa Nsina na Yesu Kristu. Ti yeeyo.

494 Vano exeeni? Mutthu oopacerya otonko omiseriwa wala otonko opatisiwa mwa khula enamuna mwa nsina na “Tithi, Mwaana, Erooho Yoowaarya,” waari mukereja Katolika. Omiserya woopacerya waatonko wiiraneya, waari mukereja Katolika. Oyeeheriwa woopacerya otonko wiiraneya, waari mukereja Katolika. Ekereja Prustante kweekwe yaapatisa. . . mBibiliani, arummwa, epwinihiwaka mwa Nsina na Yesu Kristu. Mapuro othene. Mphwanye nipuro nimosa paahi vaavo awo yiiranse-aya etthu ekina, moone.

495 Vano, mwa yeela, okathi ula muulupale, aYuta khakhanle. . . Miyo kaahimukoha rabbi ule, miyo khwira, “Rabbi, yaamukhala yoorika nyuwo owaamini maprofeta?”

496 Owo khwira, “Miyo kinniwaamini maprofeta.”

497 Miyo khwira, “Mwa Yesaya 9:6, owo aatthuna ohimya exeeni, ‘Nooyareliwa Mwaana mulopwana’? Owo aamuhimya pani?”

498 Owo khwira, “Owo aamuhimya Mesiya.”

499 Miyo khwira, “Vano Mesiya onoorowa oyariwa?”

500 “Ayo, Owo onoorowa oyariwa.”

501 Miyo khwira, “Vano vakhala wira Owo ohaana oyariwa, Owo orina e. . . Owo onoorowa okhalana maama.”

502 “Ayo, Owo ohaana okhalana maama. Ni Owo ohaana okhalana tiithi, nave,” owo khuhimya.

503 Miyo khwira, “Voomalela. Nto yaamukhala yoorika nyuwo waamini wira khiyaarowa okhala. . . wira Muluku Yehova Muulupale Yoowo aatthukunle Ephareya Yooxeerya, khaawerya omuyara Mwaan’ola ni eyareliwo yoohihononeya?” Munnona? Owo aari vale.

504 Owo khwira, “Masi khivanweryaneya omukhaliha Owo amuluku araru.”

505 Miyo khwira, “Owo kahiyo amuluku araru.” Miyo khwira, “Evaraanelo xeeni onrowa okhala Mesiya ni Muluku?”

506 Owo khwira, “Owo onrowa okhala Muluku.”

507 Miyo khwira, “Vano munnisuwela saana. Vano munnisuwela saana, Owo Mulukuu.” Eyo ti yoolikana.

508 Vano owo khuphavela okileela, khwira, “Ahe, mulopwan’ola aari nawiye, Yesu ula a oNasareti. Owo aari nawiye.”

509 Miyo khwira, “Rabbi, moota xeeni Owo aaryaawe nawiiye?”

510 “Ahe,” owo khwira, “soolempwa sanyu yeenyu sihimmye wira ‘Owo aahikela mmatta mwa etiriku nihiku na Saapatu, khuvurula mikala sa etiriku.’”

511 Miyo khwira, “Vano, rabbi, nyuwo munnisuwela oratteene. . . vanci-ene sa Soolempwa ovikana yeeyo. Yoolempwa anyu enihimya wira eyo ti ya nlamulo, ‘Ti ya nlamulo mutthu okhuura makala a etiriku ntoko owo sintthunaawe, masi ohiheleke mmurupani mwawe ni okuxa. Malamulo anyu yeenyu, rabbi.’”

512 Vano owo khweemela vale okathi vakhani, owo—owo—owo khwaamini, okhala wira owo—owo aahikhala namoona. Owo khwira, nuuvira okathi vakhani, owo khwira, “Ahe, exeeni—exeeni yaairihale maitho a Yohani. . .” Khwira, “Mwiirale sayi yeeyo?”

513 Miyo khwira, “Mwa Nsina na Yesu Kristu.”

514 “Ah.” Owo—owo khaasuwela; khwira, “Ahe, khimukhanle omuthikilasa Muluku ipantte tthaaru.”

515 Miyo khwira, “Owo aari Yehova owiisooniherya mw’erutthuni, Rabbi. Owo. . . Ti yeeyo Owo aary’awe, Owo aari Yehova mw’erutthuni. Nsina Nawe yoowo na omutthu, nle naari Nsina na nvuluxo, okhala wira khanivo hata nsina nikina nivaheriwe vathi v’Erimu mutthu okhanlyaawe woopowaka, voohikhala paahi mwa Nsina nenlo na nvuluxo na omutthu: Pwiya Yesu Kristu. Eyo ekeekhaii. Owo aari Muluku, Owo Mulukuu, Owo onookhala Muluku mahiku othene, eyo ekeekhaii voolikana, Pwiya Yesu Kristu.”

516 Vano, kookupali wira ekereja y’Amalapo vahilekenle enoo. . . omalela wa erutthu ya ekereja y’Amalapo. Mikhora eriyari ya. . . Yesu oohimya, mwa Matewu 24, (kinookuxa Yoolempwa yeeyo emosa minuutu mmosa), Owo iirale, “Awo anoopwexakasa makokoro a oYerusalemu mpakha okathi w’Amalapo omala.”

517 Vano nwehe. Eyo ehimmwe ni Pwiya’ahu Yesu, mwa Matewu 24, wira aYuta yaamukumihiwa valataratoni. Daniyeli aahihimya, ottuli wu mwa maprofa a khalayi, owo iirale wira saamukhala isumana miloko mithanu na miili nlelo soovahiwa, aYuta. Vano Mesiya aamurowa orwa (Mukhulupale) ni aamulaleerya s’eprofa eriyari ya esumana yanamiloko mithanu na miili, seiyo saari iyaakha thanu ni piili, Owo aamurowa okumihimya eriyari. Nkawehani moota yaary’aya yoolikana, Yesu aahilaleya iyaakha tthaaru ni nuusu nto khukhomeliwa vamwiikimanyo. Masi sookhala tthaaru. . . Eyo enrwa va yookoha ela ekina va. Sookhala iyaakha tthaaru ni nuusu nlelo avahiwaaya, aYuta. Ehaana okhala.

518 Vano nyuwo mwakuxa Wiisuupulula, kapiitulu 7, Yohani aahiwoona aYuta ikonto emiya ni ikonto miloko mixexe ni ikonto xexe othene oothittiwa ekanyeryo, a mahimo muloko ni manli a Isarayeli. Munnoona entthunaaka ohimya? Ehanle wiiraneya, ohinatthi orwa.

519 Vano nkawehani moota ereeralyaaya, nihinatthi omaliha vano. Nwehe moota—moota eyo eneettaaya. Vano, aYuta ale yaahiripihwa wiitho.

520 Vano, aYuta ala va, anci-ene aya va, ari paahi. . . nyuwo moosuwela moota akhanly'aya, awo t'arina muhakhu wa molumwenkuni. Ni awo paahi a—atthu oocaliwa ni musurukhu, ni eyo ti yothene mukhanlyaanyu owoonaka, moone; ni oowiihelana saana, ni oohicaliwa, ni khaniwasa. Masi, awo kahiyo ale Owo aahimyaawe, nyuwo mwaweha vale.

521 Vano, Amalapo. . . Vano nwehe, nlelo sookhala iyaakha tthaaru ni nusus sihanle w'aYuta ala. Vano, Yesu ohimye wira muttetthe w'oYerusalemu ononyakattiwa n'Amalapo mpakha okathi w'Amalapo. . . (Vano, nyuwo atthu muhinaamini okathi, anki yeeyo?). . . Mpakha okathi w'Amalapo omala. Nto okathi w'Amalapo wamala (okathi w'Amalapo omala), vano muttetthe onoottikihiriwa aYuta. Vano Yesu aahikelela ohoolo ahimya wira nloko. . . Khwira, "Mwakhuma vale munoona mwiri wa fiiku opuwa ithutu saya, ni miri sothene sikina siphuwaka," khwira, "moosuwela wira elimwe yookhuveela." Khwira, "Siiso moonakaru itthu iya wiiraneya, musuwele wira okathi ori vakhiviru, vamukhora; ni vekeekhayi kinooleelani wira nloko nla khaninvira mpakha itthu iya omaliheriwa."

522 Vano, awo yaaniwehererya yeeyo mwa nloko nenle, "Ti yeeyo Owo aahimyaawe." Mwa hata enamuna!

523 Nwiriyaane! Owo iirale, "Nloko ninrowa woona mwiri wa fiiku opuwa ithutu saya." Vano nwehe, Owo ohimye wira, "Mwiri wa efiiku, ni miri sothene sikina." Vano, mwa moolumo makina, "Onookhala muhakalaliho wa mulaponi mothene mwa okathi aya." Vano nkawehani elaleeryo ela y'eprofeta, moota enkelaaya evaraka muteko ni olikana oratteene. Vano nwehe. "Miri sothene mikina siphuwaka ithutu saya, sithikelaka okhala sikumi." Mwiri, waaphuwaka ithutu saya, onthikela okhala mukumi. Eyo ekeekhai? Vano, khula mutthu onnisuwela, musomiha a oprofeta, wira mwiri wa efiiku kweekwe onnikhalaka muYuta. Hiyo noosuwela eyo. Owo muYuta. Vano e. . .

524 Nto nkanweheni Yoweli, okathi waalaleiyaawe, owo iirale, "Iye ipalaka saahiyale-aya, saalyiwe ni kharipe; iye kharipe aahiyale-awe, saalyiwe ni isoope; iye isoope saalyiye-aya. . . ." Mwaweha vale, owo mwaaxiitthu mmosaru, mwa mikhalelo soovirikana: epalaka, kharipe, esoope. Sothene mwaaxiitthu mmosaru, mwa mikhalelo soovirikana sa ekumi awe paahi.

Vano nwehe, mwaaxiitthu ene yoowo aapacenrye okhuura mwiri yoowo muYuta okathi uwo, onoothikila, khupacerya okhuura ni okhuura ni okhuura ni okhuura mpakha okhaliha nttoro; masi nto owo khwira, “‘Miyo kinoohokoloxa,’ anihimya t’Apwiya, ‘miyaakha sothene esoope ekhuuralyaaya. Nto kinimwaakhaliha atthu Aka ootthapa.’” Munnona? Vano, mwiri wookhuuriwa. Amalapo aattopanyeriwa-mo, eyo ekeekhaii. Vaareera, nihaana wiima muhokorokho.

⁵²⁵ Vano waphiya okathi wa wookiseryani, naakhuveelaka okathi wookiserya (vakhala wira kinsoma oratteene), Ehapari yooreera ti: ohaana okhala muhakalaliho muulupale oniiraneya.

⁵²⁶ Vano, mwaahisuwela wira epantera y’aYuta ti epantera ya khalayixa mulaponi? Ni eyo yaaroorupa miyaakha ikonto piili, ovikana yeeyo, miyaakha soophiyaka ikonto piili ni imiya thanu. Epantera y’aYuta, ettheneeri ile ya malooho mathanu na mosa ya Davidi, khenaveveleye mwa miyaakha ikonto piili ni imiya thanu; okhuma vakuxiwaaya o—oPapilooniya. Nto vano, okhala wira Omwene w’oRooma ohaaxintta (ni Mesiya khurwa vano awo khimukhootta Owo), nto yaahimwaramwareliwa itheku sooxeexe sa mulaponi. Masi mwaahisuwela wira, mahiku mathanu na mosa a mweeri wa Maayu, 1946, epantera ele yoothikela-tho oYerusalemu? Mwaahisuwela wira, mahiku mathanu na maili a mweeri wa Maayu, 1946, Nlaikha n’Apwiya naahikikhumelela (mmeeloni mwaya) nno, khukiruma molumwenkuni mothene wira kiruue muhakalaliho? Voosiisu aya woottharelana! Okathi epantera ele ewenlyaaya oYerusalemu, nsuwa nitupweelaka makaaripi, Nlaikha n’Apwiya naahikikhumelela wenna Estadu Unidu okathi mmosaru. “Moonakaru mwiri wa efiiku ni miri sikina siphuwaka!”

⁵²⁷ Akavi anuupuwela Ettheneeri yaathomeiye nno oMuro Ohio, miyaakha sinci-ene sivinre, okathi Owo iiraly’awe... Va eri elatarato Aya va nlelo, okathi Owo aakhurunwaawe. Khwira, “Mutthak’anyu onoorowa ntoko mahoolela a Orwa wa neili, siiso ntoko Yohani aaronwaawe ntoko mahoolela a Orwa woopacerya.” Nto, nwehe, mulaponi mothene ohoorwa muhakalaliho. Imaara ikonto miloko imaara ikonto sene ni ikonto sene, nto muhakalaliho muulupale.

⁵²⁸ Alipa-ootthariha ikano othene, ni oohiyana-hiyana mulaponi mothene, ni ikereja suulupale khwira, “Mahiku a Billy Sunday aamala.” Masi okathi awo yoonansaaya ekereja opacerya okhalana muhakalaliho (atthu pure), yaahaana wira etthu wira ehiisoone voonanara. Charles Fuller aamurowa okuxa opuro, masi owo khaareere wuuluvala; vano awo khurwa ni Billy Graham. Nto Muluku khimuthanla Billy Graham, ahiiso, ekereja Patista khumuthanla, nto awo othene khwiiraana ni yoowo. Nto Billy Graham kahiyu nuusu na mulaleyi Munna Neville

sikhanlyaawe, kinihimya okhala mulaleyi, kahi o . . . nnari, khiva namuna. Masi exeeni iyo? Awo yaahaana wira, eyo etthokiheryo, nto atthu othene yaahiiraana ni yeeyo, athukumanaka. Billy onihimya etthu emosaru. Moone, awo yaahaana wira. Ni yaahaana wiiriwa wira emaliherye Masu a Muluku. Awo khayaarina Erooho wira ethukumane, tivo yaahaana okuxa Masu wira ethukumanele; tivo awo yaahiira. Ni Billy mulaleyi a Masu, ni ooratta, nto awo yaahiiraana ni yoowo; tivo eyo yaahikeliha sookhaleleya sothene sooriirya vamuthukumanoni vaavo. Ni Ookhala a erimu, ni ovoniha wa Muluku, ni owerya ni ovara muteko ni sikina, ni miiriirya sa Muluku, muhele ela . . . Ekereja, Mwaakameliwa ookuxiwa orina Makhura muxamaniyani Mwawe, oohela mmuhakalalihoni. Munnona? Nto ekereja yooriirya yookhaleleya yaahikhalana muhakalaliho aya. Nto va ori Isarayeli ohokolowaka ni muhakalaliho aya.

⁵²⁹ Miyo kookhalana efiilime owannyaka naanaano va, *Minutu Miraru Mpakha Ohiyu eriyari*. Ni nookhalana elatarato y'aYuta ale ehokolowaka. Ehokolowaka; nyuwo muhona eyo murevistani *Look*. Ni apaketi, oopakhireliwa, ekhumaka Irani ni mapuro awo wu; aYuta ale khanasuweleke wira Yesu ootoko okhala elapo ya vathi, awo yaaronwe iwe okathi yaakuxiwaaya oPapilooniya. Ti yeeyo awo yaatonko aya osuwela. Awo yaahilima . . . nyuwo muhona eyo murevistani *Look* wala *Life* ni sikina, vaavo awo yaalimaaya ni ikaruma sa nntoro sa khalayi. Nto okathi yoonansaaya matteeke ale erwaaka, awo khuupuwela, "Ela ti yeeyo," okhala wira Muluku aahaaleela "wira yaamurowa okhala iwe, ni yaarowa ottikiheriwa oYerusalemu ekuxiwe vamapaphunai va axawawe." Eyo ekeekhaii. Awo ari weiwe. Nto muYuta khwira, "Ela ti yeeyo." Awo yaarookelela ohoolo, ni hiyo nookhalana ilatarato saya ni nsu naya, vaakohasiwaaya; erwaasaka okhuma molumwenkuni mothene. Akina aya yaakunxe-ene anaxuulu aya ottuli, n'ale oohoono ni oorakala. Nto awo ekhumasaka mpaketini okhuma mapuro othene oohiyana-hiyana a molumwenkuni, ekelaka.

⁵³⁰ Vano awo khupacerya ottotta maluku ni mirupa, vathi; nto olelo awo aaphwanyasa iphattuwelo sa maasi, ekhanle elapo yuulupalexa, ya miteko sa olima molumwenkuni. Ephareya Yookhwa erina mihakhu sinci-ene ovikana olumwenku wothene vamosa. Ayuta anoohokolowa; eyo erimwiiipithiheriwa Amalapo, masi awo anoopathuluwa ntoko ethutu.

⁵³¹ Awo khwaahimeerya—aYuta ale, awo khwira, "Munootthika wira mukhwe elapo anyu."

⁵³² Khwira, "Hiyo ninthikela omoona Mesiya. Ori vayi Yoowo? Owo ohaana okhala wenno."

⁵³³ Munna, moonaka mwiri wa efiiku ophuwaka ithutu saya, Owo iirale, "Nloko nla khanivira mpakha sothene omalihiriwa." Nkawehani muhakalaliho ni sookhaleleya.

Nkawehani muhakalaliho ni Ekereja. Nkawehani muhakalaliho onoorwa ni aYuta, awo anwehererya orwa wa Mesiya. Ekereja, Ekereja yoosareya Erooho, Mwaakameliwa ni e. . .harusi ni makhura muxamaniyani mwaya anoorowa Oniirani n'Othela.

⁵³⁴ aYuta animwiira, “Ela ti yeeyo. Vale ori Muluku ahu ole naamulipelelaahu.” Ti vaavo ale ikonto emiya ni ikonto miloko mixexe ni ikonto xexe. . .aRuseliita yiitapannye-aya. Vale ari aYuta ale anrowa omwaakhela Yoowo. Awo khwira, “Vale ori Muluku ahu ole naamulipelelaahu.” Awo anoomoona Owo, yiire, “Mphwannye woowi? Mphwannye woowi mirahu iya mmatatani mw'Anyu?”

⁵³⁵ Owo khwira, “Kiphwannye owannyaya apatthani Aka.” Ti yeeyo, “Owannyaya apatthani Aka.”

⁵³⁶ Owo onrowa wira exeeni? Ekereja y'Amalapo enrowa oroihiwa Movuwani ni Mwaakameliwa onrowa otheliwa ni Kristu.

⁵³⁷ Yosefe aaisuwelinde sayi w'atthu awe? Owo aaroomukumiha khula Mmalapo ohoolo wawe. Owo vekeekhai aahiira. Exeeni enrowa okhumelela ni osuulu waahanle wa muthiyana? Ehanasi yaahixuwa maasi mwaano mwaya wira ewane ekhotto; Yesu ohimnye wira, “awo yaamurowa woomoleliwa mw'epiphini, nto onookhala wunla ni olumanyiha maino,” okathi muulupale wo olupatthiwa ni weereriwa onoorweela ekereja y'Amalapo.

⁵³⁸ Exeeni enrowa okhumelela nto? Okathi onrwaaya okhwela waamini, okathi Muluku onvalaanihaawe itthu sothene na aYuta ale wu, Yesu onootthika ntoko Yosefe siiralyaawe. Vaamwiiwalyaaya Yosefe, okathi aakumihale-awe makwarta awe othene ni itthu sothene sikina, ni khumoono Peniyamini mwaamukhaani ni awo yeemelanse-ene vale, ni awo yiiniwaka murima mwaha wo omwiiwa Yosefe. Awo yuupuwela wira yaahimwiiwa Yosefe, nto va owo aaphwanyaneya ohoolo waya. Owo khwira, “Miyu ka Yosefe. Miyu ka munn'inyu.”

⁵³⁹ Vano vekeekhai yaahithukumela, “Owo ti Yosefe. Vano hiyo ninnimusuwela.”

⁵⁴⁰ Okathi Owo onrowaawe wira, “Miyu ka Yesu. Miyu ka Mesiya.”

⁵⁴¹ Awo anrowa wira, “Oh, wulu, vano ninrowa waakhela exeeni!”

⁵⁴² Sothene saaireliwe ovuwa wa Muluku. Khenrowa okhala Owo. . .Ahe, awo yaaniwerya omwiiwa owo anlaka okhuma mpaani mwa Farawo, Yosefe anlaka mwaha w'awo.

⁵⁴³ Mulipelele mpakha Yesu owoone aYuta ale Owo aarinaawe waakhaliha ohoona wira anitthuniherye hiyo Amalapo okhalana okathi w'okela, enrowa okhala ewoora, kinimooleelani. Owo onimwaakuxa aYuta ale, muhivela-vele, aYuta ale animoopowa. Ayo, mulopwana, ohaana okhala weiwe.

Nto owo ti muupuwelo aka wa yeeyo, nkinwerya woona hata nipuro nikina mwa Soolempwa. Muhaana okhalana makhuru awo mararu vamosa, emaara ekina.

⁵⁴⁴ Muhaana okhalana a—aximwali harus i oorupa, e—ekereja ene pure, enihimya, moone. Muhaana okhalana ekereja...Eyo ti wii, aYuta toko, aYuta toko, yaawo akhanle mutthu oohoona paahi olipelelaka epantte aya. Muhaana okhalana nivalo noottharelana, akhanle aximwali aharusi oorupa, yaawo yaari oopisiha, yaakhumme paahi ni yaarowa okereja, ni yaaitakanxale ekereja, ni mutthu ooreera murima. Vano muhaana okhalana Ekereja, ya erooho, Okoxiwa, Mwaakameliwa, eyo yeemenle vo. Atthu awo araru, khimukhanle...awo khantakaniheya, hata vakhani. Awo othene kahiyo mmosaru. Kahi Anamoona a Yehova yiiraka, “aakhala ikonto emiya ni ikonto miloko mixexe ni ikonto xexe ti Mwaakameliwa”; eyo ti yoovonyeya. Awo t’aYuta, moone. Ookhala Mwaakameliwa mmosa, aYuta, ni mwali harus i oorupa. Ni nyuwo munimwaatakanxa awo othene, ni wira, “Ahe, othene aya araru ari mapuro oovirikana.” Awo othene, mixovo miraru soovirikana s’atthu. Vekeekhai, awo khakhanle okhalaka.

⁵⁴⁵ Vano okathi Yesu onthikelaawe elapo ya vathi...aYuta, awo ankhala exeeni? Alipa-oohuliwa a mpaani moolompa. Ni okathi Yesu onthikaawe, Owo onrwa *ni* Mwaakameliwa. Yesu onrwa vaara vararu: Owo orwiye emaara yoopacerya wira *avuluxe* Ekereja Awe, Owo onrwa emaara ya neenli wira *aakhele* Ekereja Awe, Owo onrwa emaara ya neeraru *ni* Ekereja Awe. Munnona? Voolikana. Tivo yothene eyo orwa wuulupale wooloka, yothene ti Muluku mmosa muulupale ooloka; sothene ti Kristu mmosa muulupale ooloka voomalela; Ekereja emosa yuulupale yooloka voomalela, ovuluxiwa wuulupale wooloka voomalela, . . .sothene; eyo enrwa mwa oraaru, masi sothene siri mwa Mmosa. Munnona? Kahi atthu araru, kahi tthaaru *ela*; ti Mutthu mmosa paahi, Ekereja emosa, Erutthu emosa, Kristu mmosa, Pwiya mmosa “mwa nyuwo othene, ni ovira mwa nyuwo othene,” ni sikina siiso. Othene mmosa!

⁵⁴⁶ Apwiya yooreeriheni. Miyo nkireere woopisihani.

⁵⁴⁷ Apwiya yatthuna vale, vano, kaphiyerya-tho orwa ohiyu vakhani, wala Ttiminku ohiyu wala etthu ntoko yeeyo, vakhala wira pastore va khorina etthu mmurimani mwawe, kinimwehererya waakhula iya va. Oh, sookhala kamosa-kamosa sooreera va. Akavi yaatthuna wiiwa seiyo? Oh, miyo okisivela. Mukihiye kosome-tho seiyo, kaakuvaka, nihinatthi onvahererya muteko pastore.

⁵⁴⁸ Nwiriyaane ela paahi:

Maluku awo antho-...? Maluku awo anthoonyerya exeeni mwa Wisuupulula, 21? Ela ti yooreera.

Muleeliherye inama xexe sa Wiisuupulula 5. Ela ekina yooreera.

T'ani akhanle mahumu miloko miili ni maxexe? Ela ekina yooreera, moone.

Nliinya nooxeerya na Maphattuwelo 38 nnihimya-ni? Munnuupuwela, owo aahirowa khimukuxa mwaara a mwan'awe khukhala ni yoowo ntoko namuttompe; ni kuhuhelela ehisapo khukhuma; vano nto okathi oyariwaawe mwaana, awo khuhela nliinya nooxeerya vantatani vawe (owo aarookumiha vano nto khutthikela okeliha), o—ole mukina khukhuma owo ohinatthi. Oh, eyo ti yooreera; vekeekhai ti yeeyo.

Soovaha xeeni sinveleelihiwa mwaha wa okhwa w'anamoona aili, mwa Wiisuupulula 11? Owo p'ukathi Moise ni Eliya antthikasaaya mwaha wa muhakalaliho wa atthu ala ikonto emiya ni ikonto miloko mixexe n'atthu ikonto xexe. **Soovaha iyo exeeni?** Nwehe exeeni iyo, ela ti yoothamaleya.

Atthu oowaarya anrowa okhala vayi nuuvira miyaakha ekonto emosa'...(ela ti yooreera, mmiravo. Ono...)**... olamulela? Muthinto xeeni w'erutthu awo anrowaaya okhalana?**

Ninrowa olamula sayi malaikha?

Xeeni maihi okhalaka mwaha wa malaikha mwa aKorinto Oopacerya? Muliivuruni mwa aKorinto Oopacerya. Sikina sooreera, sooreera saana.

⁵⁴⁹ Apwiya yooreeriheni. Kinroromela wira Apwiya anoonitthuniherya okhala vamosa n'uvaanyihana itthu iya, sothene ti sa ovuwa Waya. Khino khaniniiraana mwa miyuupuwelo mwaha wa seiyo; masi kinoohimya etthu emosa, nyuwo othene mwaatteeliwaka murima mwiiwaka seiyo okathi onlavulaaka sa seiyo, ninviraha okathi wooreera. Amen. Amen.


⁵⁵⁰ Vaareera, Apwiya vekeekhai yooreereleni murima vano. Muhiliyale mitoko s'okokhorela. Eprokrama ya Munna Neville, vano, mu WLRP, Saapatu voosiisu ewoora ya neethanu na xexe; nikhuru na axexe Neville, ni kookupali wira anoowoonihani oreera, mmutthukule nwiiwase. Ni miyo kawerya vale, katthika vale m'okathi, wala koono wira kinootthika, kinoowiihana amwaar'aka; Apwiya yakitthuniherya vale orowa omoona Munna oophentiwa Bosworth mutokweene. Miyo...Nyuwu othene...ni miyo kinootthika Ttiminku ohiyu.

⁵⁵¹ Apwiya yooreereleni murima vano. Nto munna, pastore, murwe va minuutu mmosa paahi; akuxe muteko. Ni:

Muhiliyale mavekelo a mw'emusini,
 Yesu onthuna okumana ni nyuwu vaavo;
 Owo onookuxa ovelavela wanyu wothene,

Oh, muhiliyale mavekelo a mw'emusini.

⁵⁵² Ennoosivelani yeeyo? Akavi munvekela vatthokoni vanyu? Nrowe noone, othene...othene...Ti yooreera, mukhaleke vakhiviru ni Muluku. Mukhaleke ooreera murima, anamwane, Muluku ooreeriheni.

Vaareera, Munna Neville. 

57-1002 Sookoha ni Soowaakhula aHeperi Mpantte II
Branham Tabernacle
Jeffersonville, Indiana wAmerika

EMAKHUWA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org